





毛氏正本

唐  
人  
六  
集



汲古閣藏板





常建詩目錄

卷之一

五言古詩

送陸擢 ● 送李十一尉臨溪 ● 江上琴興 ● 湖中  
 晚霽 ● 宿王昌齡隱居 ● 送楚十少府 ● 張山人  
 彈琴 ● 白湖寺後溪宿雲門 ● 閒齋臥病行藥至  
 山館稍次湖亭二首 ● 塞上曲 ● 仙谷遇毛女意  
 知是秦官人 ● 夢太白西峰 ● 鄂渚招王昌齡張  
 僮 ● 春詞二首 ● 張公子行 ● 晦日馬鐙曲稍次





中流作●古意

卷之二

五言古詩

宿五度溪仙人得道處●西山●贈三侍御●第  
三峰●古興●高樓夜彈箏●客有自燕而歸哀  
其老而贈之●白龍窟泛舟寄天台學道者●張  
天師草堂●古意三首●漁浦●空靈山應田叟  
●太公哀晚遇●昭君墓●吊王將軍墓

卷之三

五言律詩

題破山寺後禪院●送李大都護●潭州留別●  
聽琴秋夜贈寇尊師●泊舟盱眙●江行●燕居

七言古詩

古意●古興

七言絕句

送宇文六●落第長安●塞下●題法院●嶺猿  
●三日尋李九庄●塞下曲四首●戲題湖上

集外



吳故宮

常建詩目錄

終

常建詩集卷之一

汲古閣毛晉  
據宋本考較

五言古詩

送陸擢

聖代多才俊

一作秀

陸生何考槃南山高松樹不合空摧殘

九月湖上別北風秋雨寒殷勤歎孤鳳早食金琅玕

送李十一尉臨溪

泠泠花下琴君唱渡江吟天際一帆影預懸離別心以  
言神仙尉因致瑤華音回軫撫商調越溪澄碧林

江上琴興



江上調玉琴一絃清一心泠泠七絃遍萬木澄幽陰一作音  
能使江月白又令江水深始知梧一作枯桐枝可以徽黃金

### 湖中晚霽

湖廣舟自輕江天欲澄霽是時清楚望氣色猶霾曠脚  
蹶金霞白波上日初麗烟虹落鏡中樹木生天際杳杳  
涯欲辨蒙蒙雲復閉言乘星漢明又覩寰瀛勢微興從  
此愜悠然不知歲試歌滄浪清遂覺乾坤細豈念客衣  
薄將期永投袂遲回漁父間一鴈聲嘹唳

### 宿王昌齡隱居

清溪深不測一作極隱處唯孤雲松際露微月清光猶爲君  
茅亭宿花影藥院滋苔紋余亦謝時去西山鸞鶴羣

### 送楚十少府

微風吹霜氣寒影明一作流前除落日未能別蕭蕭林木虛  
愁烟閉千里仙尉其何如因送別鶴操贈之雙鯉魚鯉  
魚在金盤別鶴哀有餘心事則如此請君開素書

### 張山人彈琴

君去芳草綠西峰彈玉琴豈惟丘中賞兼得清煩襟朝  
從山口還出嶺聞清一作幽音了然雲霞氣一作意照見天地心



玄鶴下澄空翩翩舞松林改絃扣一作和商聲又聽飛龍吟  
稍覺此身妄漸知仙事深其將鍊金鼎永矣一作以投吾簪

白湖寺後溪宿雲門

落日山水清亂流鳴淙淙舊蒲雨抽節新花水對窗溪  
中日已沒歸鳥多爲雙杉松引直路出谷臨前湖洲渚  
晚色靜又觀花與蒲入溪復登嶺草淺寒流速圓月明  
高峰春山因獨宿松陰澄初夜曙色分遠日日出城南  
隅青青媚川陸亂花覆東郭碧氣銷長林四郊一清影  
千里歸寸心前瞻王一作去程促却戀雲門深畢景有餘興

到家彈玉琴

閒齋臥病行藥至山館稍次湖亭二首

旬時結陰霖簾外初白日齋沐清病容心魂畏虛室閑  
梅照前戶明鏡悲舊質同袍四五人何不來問疾  
行藥至石壁東風變萌芽主人門外一作山門綠小隱湖中花  
時物堪獨往春帆宜別家辭君嚮滄海爛熳從天涯

塞上曲

翩翩雲中使來間太原卒百戰苦不歸刀頭怨明月塞  
雲隨陣落寒日旁城沒城下有寡妻哀哀哭枯骨



仙谷遇毛女意知是秦宮人

溪口水石淺泠泠明藥叢入溪雙峰峻松栝疎幽風垂

嶺一作竹枝嫋嫋翳泉花濛濛夤緣霽人目路盡心彌通盤

石橫陽崖前流一作臨殊未窮回潭清雲影瀾漫長天空水

邊一神女千歲爲玉童羽毛經漢代珠翠逃秦宮目覩

神已寓鶴飛言未終祈君青雲祕願謁黃仙翁嘗以耕

玉田龍鳴西頂中金梯與天接幾日來相逢

夢太白西峰

夢寐昇九崖杳靄逢元君遺我太白峯一作岑寥寥辭垢氛

結宇在星漢宴林閉氤氳簷楹覆餘翠巾鳥生片雲時

往溪水一作谷間孤亭晝仍曛松峰引天影石瀨清霞文恬

目緩舟趣霽心投鳥羣春風又搖權潭島花紛紛

鄂渚招王昌齡張儉

刈蘆曠野中沙上飛黃雲天晦無精光芒茫悲遠君楚

山隔湘水湖畔落日曛春鴈又北飛音書固難聞謫居

未爲歎讒枉何由分午日逐蛟一作蛇龍宜爲弔冤文翻覆

古共然名宦安足云貧士任枯槁捕魚清江濱有時荷

鉏犁曠野自耕耘不然春山隱溪澗花一作何氤氳山鹿自



有場賢達亦顧羣二賢歸去來世上徒紛紛

春詞二首

萋萋黃柳絲濛濛雜花垂日高紅粧臥倚對一作樹春光一作風

遲寧知傍洪水驪裏黃金羈

翳翳陌上桑南枝交北堂美人金梯出素手自提筐非

但畏一作為蠶飢盈盈嬌路傍

張公子行一作古意

日出乘釣舟嫋嫋持釣竿涉淇傍荷花驄馬閑金鞍俠  
客白雲中腰間懸轆轤出門事嫖姚為君西擊胡胡兵

漢騎相馳逐轉戰孤軍西海北一作曲百尺旌竿沉黑雲邊  
笳落日不堪聞

晦日馬鐙曲稍次中流作

夜寒宿蘆葦曉色明西林初日在川上便澄游子心秦

一作晴天無纖翳郊野浮春陰波靜隨釣魚舟小綠水深出

浦見千里曠然諧遠尋扣船應漁父因一作同唱滄浪吟

古意

牧馬古道傍道傍多古墓蕭條愁殺人蟬鳴白楊樹迴  
頭望京邑合沓生塵霧富貴安可常歸來保貞素



常建詩集卷之一

終

常建詩集卷之二

五言古詩

宿五度谿仙人得道處

五度谿上花生根依兩崖二月尋片雲願宿秦人家上  
見懸崖崩下見白水湍仙人彈碁處石上青蘿盤無處  
求玉童翳翳唯林巒前溪遇新月聊取玉琴彈

西山

一身爲輕舟落日西山際常隨去帆影遠接長天勢物  
象歸餘清林巒分夕麗亭亭碧流暗日入孤霞繼日渚



遠陰映湖雲尚明霽林昏楚色來岸遠荆門閉至夜轉  
清迥蕭蕭北風厲沙邊雁鷺泊宿處蒹葭蔽圓月逗前  
浦孤琴又搖曳冷然夜遂深白露霑人衣

春詞

階下草猶短墻頭梨花白織女高樓上停梭顧行客問  
君在何所青鳥舒錦翮

贈三侍御

高山臨大澤正月蘆花乾陽色薰兩崖不改青松寒士  
賢守孤貞古來皆共難明君錯甚一作任才臺上飛三鸞操

與霜雪明量與江海寬束身視天涯安能窮波瀾孤鶴  
在枳棘一枝非所安逸翮望絕霄見欲凌雲端層臺何  
其高山石流洪湍固知非天池鳴躍同所歡誰念獨枯  
槁四十長江干責躬貴知己効拙從一官折翮悲高風  
苦飢候朝飡湖月映大海天空何漫漫托身未知所謀  
道庶不刊吟彼喬木詩一夕常三歎

第三峰

西山第三頂茅宇依雙松杳杳欲至天雲梯昇幾重瑩  
魄澄玉虛以求鸞鶴蹤逶迤非天人執節乘赤龍旁映



常建詩 卷二 二  
白日光縹緲輕霞容孤輝上烟霧餘影明心胸願與黃  
麒麟欲飛而莫從因寂清萬像輕雲自中峰山瞑學棲  
鳥月來隨暗菴尋空靜餘響嫋嫋雲溪鐘

古興

漢上逢老翁江口爲僵屍白髮沾黃泥遺骸集烏鴟機  
巧自此忘精魄今何之風吹釣竿折魚躍安能施白水  
明汀洲菰蒲冒深陂唯留扁舟影繫在長江湄突兀枯  
松枝悠揚女蘿絲託身難憑依生死焉相知徧觀今時  
人舉世皆爾爲將軍死重圍漢卒猶爭馳百馬同一銜

萬輪同一規名與身孰親君子宜固思

高樓夜彈箏

高樓百餘尺直上江水平明月照人苦開簾彈玉箏山  
高猿狖急天靜鴻雁鳴曲度由未終東峯霞半生

客有自燕而歸哀其老而贈之

羸馬朝自燕一身爲二連憶親拜孤塚移墓雙陵前幽  
願從此畢劍心因獲全孟冬寒氣盛撫轡告言旋碣石  
海北門餘寇惟朝鮮離離一寒騎嫋嫋馳白天生別皆  
自取況爲士卒先寸心漁陽興落日旌竿懸



白龍窟汎舟寄天台學道者

夕映翠山深餘暉在龍窟扁舟滄浪意澹澹花影沒西  
浮入天色南望對雲闕因憶莓苔峰初陽濯玄髮泉蘿  
兩幽映松鶴間清越碧海瑩子神玉膏澤人骨忽然爲  
枯木微興遂如兀應寂中有天明心外無物環廻從所  
汎夜靜猶不歇澹然意無限身與波上月

張天師草堂

靈溪宴清宇傍倚枯松根花藥繞方丈瀑泉飛至門四  
氣閉炎熱兩岸改明昏夜深月暫皎亭午朝始嗽信是

天人居幽幽寂無喧萬壑應鳴磬諸峰接一魂遂登

子因田生樽時節開玉書宵映飛天言心化便一作更

無影目精焉累煩忽而與一作舉霄漢寥落空南軒

古意三首

二妃方訪舜萬里南方懸遠道隔江漢孤舟無歲年不  
知蒼梧處氣盡呼清天愁淚變楚竹蛾眉喪湘川後人  
立爲廟累世稱其賢過客設祠祭狐狸來坐邊懷古未  
忍還猿吟徹空山

明月照高閣綵女褰羅幕歌舞臨碧雲簫聲沸珠箔青



鸞臨南海天上雙白鶴萬里齊翼飛意求君門樂玉霄  
九重閉金鎖夜不開兩翅自無力愁鳴雲外來態深入  
空貴世屈無良媒俛仰顧中禁東飛白玉臺  
楚王竟何去獨自留巫山偏使世人見迢迢江漢間駐  
舟春溪裏皆願拜靈顏寤寐見神女金紗鳴珮環閑艷  
絕世姿令人氣力微含笑竟不語化作朝雲飛

漁浦

春至百草綠陂澤聞鷓鴣別家投釣翁今世滄浪情漚  
紵爲緼袍折麻爲長纓榮譽失本真怪人浮此生碧水  
月自闊安流淨而平扁舟與天際獨往誰能名

空靈山應田叟

湖南無村落山舍多黃茆淳朴如太古其人居鳥巢牧  
童唱巴歌野老亦獻嘲泊舟問溪口言語皆啞咬土俗  
不尚農豈暇論肥瘠莫徭射禽獸浮客烹魚鮫余亦罟  
置人獲麋今尚苞敬君中國來願以充其庖日入聞虎  
鬪空山滿哮一作咆哮懷人雖共安異域終難交白水可洗  
心采薇可爲穀拽策皆落日江風鳴稍稍

太公哀晚遇



常建詩  
日出渭流白文王畋獵時釣翁在蘆葦川澤無熊羆詔  
書起遺賢匹馬令一作今致辭因稱江海人臣老筋力衰遲  
遲詣天車快快悟靈龜兵馬更不獵君臣皆共怡同車  
至咸陽心影無磷緇四牡玉墀下一言爲帝師王侯擁  
朱門軒蓋曜長遠古來榮華人遭遇誰知之落日懸桑  
榆光景有頓虧倏悲一作忽天地人雖貴將何爲

### 昭君墓

漢宮豈不死異域傷獨沒萬里馱黃金蛾眉爲枯骨迴  
車一作軍夜出塞立馬皆不發共恨丹青人墳上哭明月

### 弔王將軍墓

嫖姚北伐時深入強一作幾千里戰餘落日黃軍敗鼓聲死  
嘗聞一作言漢飛將可奪單于壘今與山鬼隣殘兵哭遼水



二八二

常建詩集卷之二 終

常建詩集卷之三

五言律詩

題破山寺後禪院

清晨入古寺 初日照 一作朗 高林竹逕通 一作遇 幽處禪房花木  
深山光悅鳥性渾影空 人心萬籟此都 一作俱 寂但餘 一作惟 鐘

磬音

送李大都護

單于雖不戰 都護事邊深 君執幕中秘 能為高士心 海  
頭近初月 磧裏多愁陰 西望郭猶子 將分淚滿襟



潭州留別

賢達不相識偶然交已深宿帆謁郡佐悵別依禪林湘  
水流入海楚雲千里心望君杉松夜山月清猿吟

聽琴秋夜贈寇尊師

琴當秋夜聽況是洞中人一指指應法一聲聲爽神寒  
蟲臨砌默一作急清吹裏燈頻何必鍾期耳高閒自可親

泊舟盱眙

泊舟淮水次霜降夕流清夜久潮侵岸天寒月近城平  
沙依雁宿候館聽鷄鳴鄉國雲霄外誰堪羈旅情

江行

平湖四無際此夜泛孤舟明月異方意吳歌令客愁鄉  
園碧雲外兄弟淥江頭萬里無歸信傷心看斗牛

讌居

青苔常滿路流水復入林遠與市朝隔日聞鷄犬深寥  
寥丘中想渺渺湖上心嘯傲轉無欲不知成陸沉

七言古詩

古意

井底玉冰洞地明琥珀輓轡青絲索仙人騎鳳披彩霞



挽上銀瓶照天閣黃金作身雙飛龍口銜明月噴芙蓉  
一時渡海望不見曉上青樓十二重

古興

輓轡井上雙梧桐飛鳥銜花日將沒深閨女兒莫愁年  
玉指泠泠怨金碧石榴裙裾蛺蝶飛見人不語顰蛾眉  
青絲素絲紅綠絲織女一作錦衾當爲誰

七言絕句

送宇文六

花映垂楊漢水清微風林裏一枝輕卽今江北還如此

愁殺江南離別情

落第長安

家園好在尚一作留秦耻作明時失路人恐逢故里鶯花  
笑且向長安度一春

塞下

鐵馬胡裘出漢營分麾百道救龍城左賢未遁兵一作竿  
折過在將軍不在兵

題法院

勝景門閒對遠山竹深松老半含烟皓一作月殿中三度



磬水晶宮裏一僧禪

嶺猿

杳杳囊一作裏清且切鷓鴣飛處又斜陽相思嶺上相思  
淚不到三聲合斷腸

三日尋李九莊

雨歇楊林東渡頭永和三日盪輕舟故人家在桃花岸  
直到門前溪水流

塞下曲四首

玉帛朝回望帝鄉烏孫歸去不稱王天涯靜處無征戰

兵氣銷爲日月光

北海陰風動地來明君祠上望龍堆髑髏皆是長城卒  
日暮沙場飛作灰

龍鬪雌雄勢已分山崩鬼哭恨將軍黃河直北千餘里  
冤氣蒼茫成黑雲

因嫁單于怨在邊蛾眉萬古葬胡天漢家此去三千里  
青塚常無草木烟

戲題湖上

湖上老人坐磯一作頭湖裏桃花水却流竹竿嫋嫋波無



一作  
自渡 際不知何者吞吾鉤

常建詩集卷之三

終

汲古閣毛晉  
據宋本考較

常建詩集附錄

河岳英靈集云高才無貴士誠哉是言曩劉楨死於文學左思終於記室鮑昭卒於參軍今常建亦淪於一尉悲夫建詩似初發通莊却尋野徑百里之外方歸大道所以其旨遠其興僻佳句輒來唯論意表至如松際露微月清光猶爲君又山光悅鳥性潭影空人心此例十數句並可稱警策然一篇盡善者戰餘落日黃軍敗鼓聲死今與山鬼隣殘兵哭遼水屬思旣苦詞亦警絕潘岳雖云能叙悲怨未見如此章



藝文志云常建詩一卷

肅代時人

歐陽公臨行題青州山齋曰吾常喜誦常建詩云竹徑  
遇幽處禪房花木深欲效其語作一聯久不可得乃知  
造意者難爲工也晚來青州始得山齋宴息因謂不意  
平生想見而不能道以言者乃爲已有於是益欲希其  
髣髴竟爾莫獲一言夫前人爲開其端其物景又在其  
目然不得自稱其懷豈人才有限而不可彊吾將老矣  
文思之衰耶茲爲終身之恨爾熙寧庚戌仲夏望日題  
姚寬西溪叢語曰常建題破山寺後院詩云竹徑通幽

處禪房花木深余觀又玄集唐詩類選皆作通熙寧元  
年歐陽永叔守青州題解宇後山齋云竹徑遇幽處有  
以鄔杜石本往河內以見邢和叔始末見時亦頗疑其  
誤及見碑反覆味之亦以爲佳不知別有本耶抑永叔  
自改耶古人用一字不苟也



常建集外詩

吳故宫

見萬首唐詩

越女歌長君且聽芙蓉香滿水邊城豈知一日終非主  
猶自如今有怨聲

常建字无考開元十五年進士大曆中為盱眙尉  
丹陽進士殷璠選河嶽英靈集起甲寅終癸巳上  
下四十年品藻二十四人誤錄二百三十四詩叙  
云名不副實才不合衛縱權壓梁竇終無取焉唯  
以建詩一十五首別于卷端尤稱弔王將軍一篇



中 建 詩 汲 古 閣  
以為潘岳弗如也惜其淪于下僚且曰高才無譽  
士誠哉是言可謂感慨極矣據唐藝文志及通攷  
俱云一卷今流傳詩五十有七首不知何人類而  
析之為三卷又見洪魏公載吳故宫一絕因附焉  
隱湖毛晉識

王建詩目錄

汲古閣毛晉  
據宋本考較

卷一

送人●主人故亭●古從軍●邯鄲主人●泛  
水曲●江南雜體二首●遠征歸●思遠人●  
傷近者不見●元日早朝●聞故人自征戍回  
●七泉寺上方●從元太守夏讌西樓●酌栢  
侍御聞與韋處士同遊靈臺寺見寄●荆南贈  
別李肇著作轉韻詩●早發金堤驛●和裴相  
公道中贈別張相公●和錢舍人水植詩●題



壽安南館●送張籍歸江東●勵學●山中寄  
及第故人●求友●寄李益少監兼送張實遊  
幽州●寄崔列中丞●喻時●贈王侍御●宋  
氏五女具州宋處士若芬五女若華若昭若倫若憲若茵●送于丹移  
家洛州●留別舍弟●壞屋●送薛蔓應舉●  
將歸故山留別杜侍御一作郎●送韋處士老舅  
●送同學故人●幽州送申稷評事歸平盧●  
溫門山●代故人新姬侍疾●採桑●曉思●  
早起●酬張十八病中寄詩

卷二

涼州行●寒食行●促刺詞●隴頭水●北邙  
行●溫泉宮行●春詞●遼東行●塞上梅●  
戴勝詞●鞦韆詞●開池得古釵●賽神曲●  
田家留客●精衛詞●老婦歎鏡●望夫石●  
別鶴曲●烏棲曲●雉將雛●白紵歌二首●  
短歌行●飲馬長城窟●烏夜啼●簇蠶辭●  
渡遼水●空城雀●水運行●當窗織●失釵  
怨●春燕詞●主人故池●古宮怨●關山月



●贈離曲●宛轉詞●水夫謠●田家行●去  
婦●神樹詞●祝鵲●古謠●公無渡河●海  
神謠●行見月●七夕曲●兩頭纖纖●獨漉  
歌●寄遠曲●傷韋令孔雀詞●傷隣家鸚鵡  
詞●春來曲●春去曲●東征行●荆門行●  
鏡聽詞●行宮行●羽林行●射虎行●遠將  
歸●尋橦歌●宮中調笑詞四首●銅雀臺

卷三

送人遊塞●塞上逢故人●南中●汴路水驛

●淮南使迴留別竇侍御●汴路卽事●山居  
●醉後憶山中故人●送流人●貧居●過趙  
居士擬直草堂處所●新開望山處●題東華  
觀●飯僧●照鏡●歸昭應留別城中●荅寄  
芙蓉冠子●長安春遊●冬夜感懷●初到昭  
應呈同僚●縣丞廳卽事●閑居卽事●林居  
●原上新居十三首●送李評事使蜀●新修  
道居●贈洪哲師●題法雲禪院僧●贈溪翁  
●謝李續主簿●寒食●貽小尼師●惜歡●



山中惜花 ● 和武門下傷韋令孔雀 ● 題所賃宅牡丹花 ● 隱者居 ● 昭應宮舍

卷四

杜中丞書院新移小竹 ● 同于汝錫賞白牡丹

● 送吳郎中赴忠州 ● 照鏡 ● 秋日送杜虔州

卷五

贈王樞密 一作中貴王樞密守澄宗姓也 ● 早秋過龍武李將

軍書齋 ● 江陵卽事 ● 題花子贈渭州陳判官

● 送從姪擬赴江陵少尹 ● 華清宮感舊 ● 九

仙公主舊莊 ● 郭家溪亭 ● 題金家竹溪 ● 題

應聖觀 觀卽李林甫舊宅 ● 同于汝錫遊降聖觀 ● 道

遙翁溪亭 ● 尋李山人不遇 ● 題石甕寺 ● 早

登西禪寺閣 ● 題江寺兼求藥子 ● 題詵法師

院 ● 酬于汝錫曉雪見寄 ● 從軍後寄山中友

人 ● 寄汴州令狐相公 ● 別李贊侍御 ● 和蔣

學士新授章服 ● 歲晚自感 ● 昭應官舍 ● 寄

舊山僧 ● 武陵春日 ● 寄分司張郎中 ● 上武

元衡相公 ● 上張弘靖相公 ● 上裴度舍人 ●



上杜元穎相公●贈盧汀諫議●賀楊巨源博  
士拜虞部員外●贈郭將軍●贈田將軍●贈  
胡沚將軍●村居卽事●留別田尚書●送唐  
大夫寵節歸山●送司空神童●送振武張尚  
書●送吳諫議上饒州●贈閻少保●送魏州  
李相公●贈索暹將軍●贈王屋道士赴詔●  
贈王處士●洛中張籍新居●題裴處士碧虛  
溪居●送阿史那將軍安西迎舊使靈櫬●贈  
崔禮駙馬●贈太清盧道士●送宮人入道●

上李吉甫相公●上李益庶子●題元郎中新  
宅●初授太府丞言懷●贈李愬僕射●書贈  
舊渾二曹長●上崔相公●寄楊十二秘書●  
謝田贊善見寄●晚秋病十●薛二十池亭●  
故梁國公主池亭●題柱國寺●昭應官舍書  
事●昭應李郎中見貽作次韻奉酬●閑說●  
自傷●田侍中宴席●寒食日看花●和少府  
崔卿微雪早朝●和胡將軍寓直●春日五門  
西望●長安早春●早春病中●上陽宮



卷六

寄杜侍御●寄上韓愈侍郎●贈華州鄭大夫  
●寄賀田侍中東平功成●送裴相公上太原

卷七

秋夜●水精●香印●秋燈●落葉●園果●  
野菊●荒園●南澗●晚蝶●田家●新嫁娘  
三首●故行宮●酬從姪再看詩本●別自栽  
小樹●早發汾南●宮中三臺二首●江南臺  
四首

卷八

御獵●長門燭●過綺岫宮  
東都水寧縣西五里●朝天

子詞十首寄魏博士田侍中●霓裳詞十首●  
宮前早春●奉同曾郎中題石甕寺得嵌韻●  
舊宮人●贈人二首●樓前●寄劉蕢問疾●  
聽雨●新晴●秋日後●哭孟東野二首●寄  
蜀中薛濤校書●路中上田尚書●于主簿廳  
看花●江樓對面寄杜書記●十五夜望月寄  
杜郎中時會琴客●觀蠻妓●送顧非熊秀才



歸丹陽●老人歌●和元郎中從八月十二至  
十五夜翫月五首●對酒●曉望華清宮●贈  
李愬僕射二首●秋夜對雨寄石甕寺二秀才  
●華清宮前柳●別楊校書●和門下武相公  
春曉聞鶯●田侍郎歸鎮八首●寄廣文張博  
士●早春書情●唐昌觀玉蕊花●眼病寄同  
官●九日登叢臺●題酸棗縣蔡中郎碑●江  
陵使至汝州●十五夜望月●官詞一百首

王建詩目錄

終

王建詩卷第一

汲古閣毛晉  
據宋本考較

送人

白日向西沒黃河復東流人生足著地寧免四方  
遊我行無返顧況子勿迴頭當須向前去何用起  
離憂但恐無廣路平地作山丘令我車與馬欲疾  
反停留蜀客多積貨邊人易封侯男兒戀家鄉歡  
樂爲仇讐丁寧相勸勉苦口幸無尤對面無相成  
不如豺虎儔彼遠不寄書此寒莫寄裘與君俱絕  
蹟兩念無因由



主人故亭

主人昔專城城南起高亭貴與賓客遊工者夜不  
寧酒食宴圃人栽接望早成經年使家僮遠道求  
異英郡中暫閑暇遶樹引諸生開泉浴山籬爲愛  
山中聲世間事難保一旦各徂征死生不相及花  
落實方榮我未至此中守吏非本名重君昔爲主  
相與下馬行舊島日日摧池水不復清豈無後人  
賞所貴手自營澆酒向所思風起如有靈此去不  
重來重來傷我形

古從軍

漢家

一作軍

逐單于日沒處河曲浮雲道旁起行子

車下宿槍城圍鼓角氊帳依山谷馬上懸壺漿刀  
頭分頰肉來時高堂上父母親結束迴面不見客  
風吹破衣服金瘡在肢節相與拔箭鏃聞道西涼  
州家家婦人哭

邯鄲主人

遠客無主人夜投邯鄲市飛蛾繞殘燭半夜人醉  
起壚邊酒家女遺我緝綺被合成雙鳳花宛轉不



相離縱令顏色改勿遣合歡異一念始爲難萬金  
誰足貴門前長安道去者如流水晨風群鳥翔徘徊  
別離此

泛水曲

載酒入烟浦方舟泛綠波子釣我復飲子飲我還  
歌蓮深微路通峰曲幽氣多閱芳無留瞬弄桂不  
停柯水上秋日鮮西山碧峩峩茲歡良可貴誰復  
更來過

江南雜體二首

江上風修修竹間湘水流日夜桂花落行人去悠  
悠復見離別處蟲聲陰雨秋

處處江草綠行人發瀟湘瀟湘迴雁多日夜思故  
鄉春夢不知數空山蘭蕙芳

遠征歸

萬里發遼陽處處問家鄉迴車不淹轍雨雪滿衣  
裳行見日月疾坐思道路長但令不征戍暗鏡生  
重光

思遠人



三言卷一  
三  
妾思常懸懸君行復綿綿征途向何處碧海與青  
天羈人自有念誰令長在邊少年若不歸蘭室如  
黃泉

傷近者不見

離人隔中庭幸不爲遠征雕梁下有壁聞語亦聞  
行天涯尚寄信此處不傳情君能竝照水形影自  
分明

元日早朝

大國禮樂備萬邦朝元正東方色未動冠劍門已  
盈帝居在蓬萊肅肅鐘漏清將軍領羽林持戟巡  
宮城翠華皆宿陳雪仗羅天兵庭燎遠煌煌旗上  
日月明聖人龍火衣寢殿開璇扃龍樓橫紫烟宮  
女天中行六蕃陪位次衣服各異形舉頭看玉牌  
不識宮殿名左右雉扇開蹈舞分滿庭朝服帶金  
玉珊珊相觸聲泰階備雅樂九奏鸞鳳鳴徘徊慶  
雲中竿磬寒錚錚三公再獻壽上帝錫永貞天明  
告四方群后保太平

聞故人自征戍回



昔聞着征戍三年一還鄉今來不換兵須死在戰場  
念子無氣力徒學事戎行少年得生隨有同墮  
穹蒼自去報爾家再行上高堂爾父一作弟降廢櫪  
爾母縫新裳恍恍恐不真猶未苦承望每日空出  
城畏渴携壺漿安得縮地經忽使在我傍亦知遠  
行勞人悴馬玄黃慎莫多停留苦我居者腸

七泉寺上方

長年好名山本性今得從迴看塵蹟遙稍見麋鹿  
蹤老僧雲中居石門青重重陰泉養成龜古壁飛

却龍掃石禮新經懸幡上高峰日夕猿鳥合覓食  
聽山鐘將火尋遠泉煮茶傍寒松晚隨收藥人便  
宿南澗中晨起衝露行濕花枝茸茸歸依向禪師  
願作香火翁

從元太守夏讌西樓

六月辰亦熱卑居多煩昏五馬遊西域几杖隨朱  
輪西樓臨方塘嘉木當華軒鳧鷖滿中流有酒復  
盈樽山東地無山平視大一作天海垠高風涼氣來  
灝景沉清源青衿儼坐傍禮容益存存顧一作願爲



顏氏徒歌詠夫子門

酌栢侍御聞與韋處士同遊靈臺寺見寄

西域傳中說靈臺屬雍州有泉皆聖蹟有石皆佛  
頭所出蒼葡萄香外國欲來求毒蛇護其下樵者不  
可偷古碑在雲巔備載置寺由魏家移下來後人  
始增修近與韋處士愛此山之幽各自具所須竹  
籠盛茶甌牽馬過危棧襍衣涉奔流草開平路盡  
林下大石稠過廓轉經峰忽見東西樓瀑布當寺  
門迸落衣裳秋石苔鋪紫花溪葉裁碧油松根載  
殿高飄飄仙山浮縣中賢大夫一月前此遊賽神  
賀得雨豈暇多停留二十韻新詩遠寄尋山儔清  
泠玉澗泣冷切石磬愁君名高難閑餘身愚終休  
相將長無因從今生離憂

荆南贈別李肇著作轉韻詩

輝天復耀地再爲歌詠始素傳學道徒清門有君  
子文澗瀉潺潺德峰來壘壘兩京二十年投食公  
卿一作卿相間封章旣不下故舊多慚顏賣馬市耕牛  
却歸湘浦山麥收蠶上簇衣食應豐足碧澗伴僧



王廷詩卷一  
禪秋山對雨宿且歡身體適幸免纓組束上宰鎮  
荊州敬重同歲遊歡逢通世友簡授畫戎籌遲遲  
就公食愴愴別野表主人開宴席禮數無形迹醉  
笑或顛吟發談皆損益臨甃理芳鮮升堂引賓客  
早歲慕嘉名遠思今始平孔門忝同轍潘館幸諸  
甥自知再婚娶豈望爲親情欣欣還切切又二千  
里別楚筆防寄書蜀茶憂遠熱關山足重疊會合  
何時節莫歡各從軍且愁岐路分美人停玉指離  
瑟不中聞爭向巴山夜猿聲滿碧雲

早發金堤驛

蟲聲四野合月色滿城白家家閉戶眠行人發孤  
驛離家尚苦熱衣服惟輕綌時節忽復遷秋風輒  
經脉人睡落塹轍馬驚入蘆荻慰遠時問程驚昏  
忽搖策從軍豈云樂憂患長縈積唯願在貧家團  
圓過朝夕

和裴相公道中贈別張相公

雲間雙鳳鳴一去一歸城鞍馬朝天色封章戀闕  
情日臨宮樹高烟葢沙草平會當戎事息聯影遶



三  
建  
詩  
卷  
一  
池行

和錢舍人水植詩

盆裏盛野水晚鮮幽池好初活草根浮重生荷葉  
小多時水馬出盡日蜻蜓遶朝早獨來看冷星沉  
碧曉

題壽安南館

明發行閒亭天暖幽桂碧雲生四面山水接當階  
石濕堤浴鳥痕破苔臥鹿蹟不緣塵駕觸堪作商  
皓宅

送張籍歸江東

清泉澣塵緇靈藥釋昏狂君詩發大雅正氣迴我  
腸復令五彩姿潔白歸天常昔歲同講道青襟在  
師傍出處兩相因如彼衣與裳行行成歸此一作計

離我適咸陽失意未還家馬蹄盡四方訪餘詠新  
文不倦道路長僮僕懷昔念亦如還故鄉相親惜  
晝夜寢息不異牀猶將在遠道忽忽起思量黃金  
未爲壘無以挹酒漿所念俱貧賤安得相發揚迴  
車遠歸省舊宅江南廂歸鄉非得意但貴情義彰



五月天氣熱波濤毒於湯慎勿多飲酒藥膳願自強

### 勵學

買地不肥實其繁繫耕鑿良田少鋤理蘭焦香亦薄勿以聽者迷故使官徵錯誰言三歲童還能分善惡孜孜日求益猶恐業未博況我性頑蒙復不勤修學有如朝暮食暫虧憂隕穫若使無六經賢愚何所託

### 山中寄及第故人

長長南山松短短北礪楊俱承日月照幸免斤斧傷去年與子別誠言暫還鄉如何棄我去天路忽騰驤誰謂有雙目識貌不識腸豈知心內乖着我薜蘿裳尋君向前事不歎今異翔徃徃空室中寤寐說珪璋十年居此溪松桂日蒼蒼自從無佳人山中不輝光盡棄所留藥亦焚舊草堂還君誓已書歸我學仙方既爲參與辰各願不相望始終名利途慎勿罹咎殃

### 求友



鑿形須明鏡療疾須良醫若無傍人見形疾安自  
知世路薄言行學成棄其師每懷一飯恩千重勸  
勉詞敦學既不誠朋友道日虧遂作名利交四海  
爭奔馳常慕正直人生死不相離苟能成我身甘  
與僮僕隨我言彼當信彼道我無疑針藥及病源  
以石投深池終朝舉善道敬愛當行之縱令誤所  
見亦貴本相規不求立名聲所貴去瑕疵一作各  
願貽子孫永爲後世資

寄李益少監兼送張實游幽州

大雅廢已久人倫失其常天若不生君誰復爲文  
網迷者得道路溺者遇舟航國風人已變山澤增  
輝光星辰有其位豈合離帝傍賢人旣遐征鳳鳥  
安來翔少小慕高名所念隔山岡集卷新紙封每  
讀常焚香古來誰自達取鑿有賢良未爲知音故  
徒恨名不彰諒無金石堅性命豈能長常恐一世  
中不上君子堂偉哉清河子少年志堅強篋中有  
素文千里求發揚自顧音韻乖無因合宮商幸君  
達精誠爲我求迴章



寄崔列中丞

火山無冷地濁流無清源人生在艱世何處避讒  
言諸侯鎮九州天子開四門尚有忠義士不得申  
其冤嘉木移遠植爲我當行軒君子居要途易失  
主人恩我受古人道師君直且溫貪泉誓不飲邪  
路誓不奔如何非岡坂故使車輪翻妓妾隨他人  
家事幸獲存當時門前客默默空冤煩從今遇明  
代善惡亦須論莫以曾見疑直道遂不敦

喻時

去者如弊帷來者如新衣鮮華非久長色落還棄  
遺詎知行者天豈悟壯者衰區區未死聞一作迴  
面相是非好聞苦不樂好視忽生疵乃明萬物情  
皆逐人心移古今盡如此達士將何爲

贈王侍御

遇者昧邪正貴將平道行君子抱仁義不懼天地  
傾三受主人辟方出咸陽城遲疑匪自崇將顯求  
賢名自來掌軍書無不盡臣誠何必操白刃始致  
海內平恭事四海人甚於敬公卿有惡如已辱聞



善如已榮或人居飢寒進退陳中情徹晏聽苦辛  
坐臥身不寧以心應所求盡家猶爲輕衣食有親  
疎但恐踰禮經我今願求益詎敢爲友生幸君揚  
素風永作來者程

宋氏五女

具州宋處士若芬五女若華若昭若倫若憲若茵

五女誓終養貞孝內自持兔絲自縈紆不上青松  
枝晨昏在親傍閑則讀書詩自得聖人心不因儒  
者知少年絕音華貴絕父母詞素釵垂兩髦短窄  
古時儀一作衣行成聞四方徵詔環珮隨同時入皇

宮聯影步玉墀鄉中尚其風重爲修茅茨聖朝有  
良史將此爲女師

送于丹移家洛州

憶昔門館前君當童子年今來見成長俱過述所  
傳詩禮不外學兄弟相攻研如彼販海翁豈種溪  
中田四方尚爾文獨我敬爾賢但愛金玉聲不貴  
金玉堅孤遺一室中寢食不相捐飽如腸胃同疾  
若膚體連耕一作居者求沃土漚者求深源彼邦君  
子居一作意一日可徂遷念此居處近各爲衣食牽



三建詩卷一  
三  
從今不見面猶勝異山川既乖歡會期鬱鬱兩難  
宣素琴苦無徽安得官商全他皆緩別日我願促  
行軒送人莫長歌長歌離恨延羸馬不知去過門  
常盤旋會當爲爾隣有地容一泉

留別舍弟

孤賤相長育未曾爲遠遊誰不重歡愛晨昏闕珍  
羞出門念衣單草木當窮秋非疾有憂歎實爲人  
子尤世情本難合對面隔山丘況復干戈地懦夫  
何所投與爾俱長成尚爲溝壑憂豈非輕歲月少

小不勤修從今解思量勉力謀善猷但得成爾身  
衣食寧我求固合受此訓墮慢爲身羞一作歲暮  
當歸來慎莫懷遠遊一作愁一作雙言

壞屋

官家有壞屋居者願離得苟或幸其遷回一作循  
任傾側若當君子住一日還修飾必使換榱楹先  
須木端直永令雀與鼠無處求棲息堅固傳後人  
從今勉勞力以茲喻臣下亦可成邦國雖曰愚者  
詞將來幸無惑



送薛蔓應舉

四海重貢獻珠賚稱至珍聖朝開禮闈所貴集嘉  
賓若生在世間此路出常倫一士登甲科九族光  
彩新憧憧車馬徒爭路長安塵萬目視高天昇者  
得苦辛況子當少年丈人在咸秦出門見宮闕獻  
賦待朱輪有賢大國豐無子一家貧男兒富邦家  
豈爲榮其身煌煌文明代俱幸生此辰自顧非國  
風難以合聖人子去東堂上我歸南澗濱願君勤  
作書與我山中隣

將歸故山留別杜侍御

一作  
郎

有川不得涉有路不得行沉沉百憂中一日如一  
生錯來干諸侯石田廢春耕虎戟衛重門何因達  
中誠日月俱照輝山川異陰晴如何百里間開目  
不見明我今歸故山誓與草木并願君去丘坂長  
使道路平

送韋處士老舅

憶昨癡小年不知有經籍常隨童子遊多向外家  
劇偷花入隣里弄筆書牆壁照水學梳頭應門未



王建詩卷一  
穿幘人前賞文性梨果蒙不惜賦字詠新泉探題  
得幽石自從出關輔三十年作客風雨一飄飄親  
情多阻隔如何二千里塵土驅蹇瘠良久陳苦辛  
從頭歎衰白既來今又去暫笑還成戚落日動征  
車春風卷離席雲臺觀西路華嶽祠前栢會得過  
帝鄉重尋舊行蹟

送同學故人

各爲四方人此地同事師業成有先後不得長相  
隨出林多道路緣岡復遶陂念君辛苦行令我形  
體疲黃葉墮車前四散當此時亭上夜蕭索山風  
水離離

幽州送申稷評事歸平盧

行子繞天北山高塞復深升堂展客禮臨水濯纓  
襟驅馳戎地馬聚散林間禽一杯瀉東流各願無  
異心薊亭雖苦寒春夕勿重衾從軍任白頭莫賣  
故山岑

溫門山

早入溫門山群峰亂如戟崩崖欲相觸呀豁斷行



迹脫屐尋淺流定足畏欹石路盡十里溪地多千  
歲栢洞門晝陰黑深處惟石壁似見丹沙光亦聞  
鍾乳滴靈池出山底沸水衝地脉暖氣成濕烟濛  
濛窗中白隨僧入古寺便是雲外客月出天氣涼  
夜鍾山寂寂

代故人新姬侍疾

雙轂不迴轍子疾已在傍侍坐長搖扇迎醫慚下  
牀新施箱中幔未洗來時粧奉君纏綿意幸願莫  
相忘

採桑

鳥鳴桑葉間綠條復柔柔攀看去手近散作一作  
長長鈞黃花蓋野田白馬少年遊所念豈迴顧良  
人在高樓

曉思

春條露霏霏曉氣生綠水林間棲鳥散遠念征人  
起幽花宿舍彩早蝶寒弄翅君行非晨風詎能從  
門至

早起



迴燈正衣裳出戶星未稀堂前候姑起環珮生晨  
輝暗池光冪歷密樹花歲蕤九城鐘漏絕遙聽直  
郎歸

酬張十八病中寄詩

本性慵遠行綿綿病自生見君綢繆思慰我寂寞  
情風幌夜不掩秋燈照雨明彼愁此又憶一夕兩  
盈盈

王建詩卷第一 終

王建詩卷第二

涼州行

涼州四邊沙皓皓漢家無人開舊道邊頭州縣盡

胡兵將軍別一作當築防秋城萬里人家皆已沒年

年旌節發西京多來中國收婦女一半生男爲漢

語蕃人舊日不耕犁相學如今種禾黍驅羊亦著

錦爲衣爲惜氊裘防樹一作闕時養蠶繰蠶成疋帛

那將繞帳作旌旗城頭山雞鳴角角洛陽家家學

胡樂



寒食行

寒食家家出古城老人看屋少年行丘壟年年無  
舊道車徒散行一作車入衰草牧羊一作童驅牛下  
塚頭畏有家人來灑掃遠人無墳水頭祭還引婦  
姑望鄉拜三日無火燒紙錢紙錢一作哀邨得到黃  
泉但看壠上無新土此中白骨應無主

促刺詞

促刺復促刺水中無魚山無石少年雖嫁不將歸  
頭白猶著父母衣四邊田宅非所有我身不及逐  
雞飛出門若有歸死處猛虎當衢向前去百年不  
遣踏君門在家誰喚為新婦豈不見他隣舍娘嫁  
來常在舅姑傍

壠頭水

壠水何年壠頭別不在山中亦嗚咽征人塞耳馬  
不行未到壠頭聞水聲謂是西流入蒲海還聞北  
去繞龍城壠東壠西多屈曲野麋飲水長簇簇胡  
兵夜回水傍住憶著來時磨劍處向前無井復無  
泉放馬迴看壠頭樹



北邙行

北邙山頭少閑土盡是洛陽人舊墓舊墓人家一作

洛陽人家歸墓多堆著黃金無買處天涯悠悠墓日促

崗坂崎嶇不停轂高張素幙繞銘旌夜唱輓歌山

下宿洛陽城北復城東魂車祖馬長相逢車轍廣

若長安路蒿草少於松柏樹澗底盤陀一作山頭澗底石

漸稀盡向墳前作羊虎誰家古一作石碑文字滅後

人重取書年月朝朝車馬送墓迴還起大宅與高

臺

溫泉宮行

十月一日天子來青繩御路無塵埃宮前內裏湯

各別每箇白玉芙蓉開朝元閣向山上起城繞青

山龍暖水夜開金殿看星河宮女知更月明裏武

皇得仙王母去山雞晝鳴一作明宮中樹溫泉泱泱

出宮流宮使年年修玉樓禁兵去盡無射獵日西

麋鹿登城頭梨園弟子偷曲譜頭白人間教歌舞

春詞

紅烟滿戶日照梁天絲軟弱蟲飛揚菱花霍霍繞



三  
三  
惟光美人對鏡著衣裳庭中並種相思樹夜夜還  
栖雙鳳凰

遼東行

遼東萬里遼水曲古戍無城復無屋黃雲蓋地雪  
作山不惜黃金貴衣服戰回各自收弓箭正西迴  
面家鄉遠年年郡縣送征人將與遼東作丘坂寧  
爲草木鄉中生有身不向遼東行

塞上梅

天山路傍一株梅年年花發黃雲下昭君已歿漢  
使迴前後征人惟繫馬日夜風吹滿壠頭還隨龍  
水東西流此花若近長安路九衢年少無攀處

戴勝詞

戴勝誰與爾爲名木中作窠墻上鳴聲聲催我急  
種穀家人向田不歸宿紫冠綵綵一作深褐羽斑啣  
得蜻蜓飛過屋可憐白鷺滿綠池不如戴勝知天  
時

鞦韆詞

長長絲繩紫復碧嫋嫋橫枝高百尺少年女兒重



鞦韆盤巾結帶分兩邊身輕裙薄易生力雙手向  
空如鳥翼下來立定重繫衣復畏斜風高不得傍  
人送上那足貴終睹鳴璫鬪自起迴迴若與高樹  
齊頭上寶釵從墮地眼前爭勝難爲休足踏平地  
看始愁

開池得古釵

美人開池北堂下拾得寶釵金未化鳳凰半在雙  
股齊鈿花落處生黃泥當時墮地覓不得暗想窗  
中還夜啼可知將來對夫婿鏡前學梳古時髻莫  
言至死亦不遺還似前人初得時

賽神曲

男抱琵琶女作舞主人再拜聽神語新婦上酒勿  
辭勤使爾舅姑無所苦椒漿湛湛桂座新一雙長  
箭繫紅巾但願牛羊滿家宅十月報賽南山神青  
天無風水復一作損碧龍馬上鞍牛服軛紛紛醉舞  
踏衣裳把酒路傍勸行客

田家留客

人客少能留我屋客有新漿馬有粟遠行僮僕應



苦飢新婦厨中炊欲熟不嫌田家破門戶蠶房新  
泥無風土行人但飲莫畏貧明府上來可苦辛丁  
寧回語屋中妻有客勿令兒夜啼雙塚直西有縣  
路我教丁男送君去

精衛詞

精衛誰教爾填海海邊石子青磊磊但得海水作  
枯池海中魚龍一作魚鼈何所為口穿豈為空銜石山  
中草木無全枝朝在樹頭暮海裏飛多羽折時墮  
水高山未盡海未平願我身死子還生

老婦歎鏡

嫁時明鏡老猶在黃金縷画雙鳳背憶昔咸陽初  
買來燈前自繡芙蓉帶十年不開一片鐵長向暗  
中梳白髮今日後床重照看生死終當此長別

望夫石

望夫處江悠悠化為石不迴頭山頭日日風復雨  
行人歸來石應語

別鶴曲

主人一去池水絕池鶴散飛不相別青天漫漫碧



海重知向何山風雪中萬里雖然音影隔一作在兩心  
終是死生同池邊巢破松樹死樹頭年年鳥生子

鳥棲曲

章華宮人夜上樓君王望月西山頭夜深宮殿門  
不鎖白露滿山山葉墮

雉將雛

雉咿喔雛出殼毛斑斑嘴啄啄學飛未得一尺高  
還逐母行旋母脚麥壟淺淺難蔽身遠去戀雛低  
怕人時時土中鼓兩翅引雛拾蟲不相離

白紵歌二首

天河漫漫北斗璨宮中鳥啼知夜半新縫白紵舞  
衣成來遲邀得吳王迎低鬟轉面掩雙袖玉釵浮  
動秋風生酒多夜長夜未曉月明燈光兩相照後  
庭歌一作舞聲更窈窕

館娃宮中春日暮荔枝木瓜花滿樹城頭鳥栖休  
擊鼓青娥彈瑟白紵舞夜天瞳瞳不見星宮中火  
照西江明美人醉起無次第墮釵遺佩滿中庭此  
時但願可君意迴晝爲宵亦不寐年年奉君君莫



三  
建  
詩  
卷  
二  
棄

短歌行

人初生日初出上山遲下山疾百年三萬六千朝  
夜裏分將強半日有歌有舞須早爲昨日健於今  
日時人家見生男女好不知男女催人老短歌行  
無樂聲

飲馬長城窟

長城窟長城窟邊多馬骨古來此地無井泉賴得  
秦家築城卒征人飲馬愁不迴長城變作望鄉堆  
蹄蹤未乾人去近續後馬來泥污盡枕弓睡着待  
水生不見陰山在前陣馬蹄足脫裝馬頭健兒戰  
死誰封侯

烏夜啼

庭樹烏爾何不向別處棲夜夜半當戶啼家人  
把燭出洞戶驚棲失群飛落樹一飛直欲飛上天  
迴迴不離舊棲處未明重繞主人屋欲下空中黑  
相觸風飄雨濕亦不移君家樹頭多好枝

簇蠶辭



蠶欲老箔頭作蠶絲皓皓場寬地高風日多不向  
中庭嚙蒿草神蠶急作莫悠揚年來爲爾祭神桑  
但得青天不下雨上無蒼蠅下無鼠新婦拜簇願  
蠶稠女灑桃漿男打鼓三日開箔雪團團先將新  
蠶送縣官已聞鄉里催織作去一作送與誰人身上  
著

### 渡遼水

渡遼水此去咸陽五千里來時父母知隔生裏著  
衣裳如送死亦有白骨歸咸陽營家各與題本鄉  
身在應無迴渡日駐馬相看遼水傍

### 空城雀

空城雀何不飛來人家住空城無人種禾黍土間  
生子草間長滿地蓬蒿幸無主近村雖有高樹枝  
雨中無食長苦饑八月小兒挾弓箭家家畏向田  
頭飛但能不出空城裏秋時百草皆有子報言黃  
口莫啾啾長爾得成無橫死

### 水運行

西江運船立紅幟萬棹千帆繞江水去年六月無



稻苗已說水鄉人餓死縣官部船日算程暴風惡  
雨亦不停在生有樂當有苦三年作官一年行壞  
舟畏鼠復畏漏恐向太倉折升斛辛勤耕種非毒  
藥看著不入農夫口用盡百金不爲費但得一金  
卽爲利遠徵海稻供邊食豈如多種邊頭地

當窗織

歎息復歎息園中有棗行人食貧家女爲富家織  
翁母隔墻不得力水寒手澁絲脆斷續來續去心  
腸爛草蟲促促一作織機下啼兩日催成一疋半輪

官上頂有零落姑未得衣身不著當窗却羨青樓  
倡十指不動衣盈箱

失釵怨

貧女銅釵惜於玉失却來尋一日哭嫁時女伴與  
作粧頭戴此釵如鳳凰雙杯行酒六親喜我家新  
婦宜拜堂鏡中乍無失髻樣初起猶疑在牀上高  
樓翠鈿飄舞塵明日從頭一遍新

春燕詞

新燕新燕何不定東家綠池西家井飛鳴當戶影



王建詩卷二  
十一  
悠揚一遶簷頭一遶梁黃姑說向新婦女去年墮  
子汗衣箱已能辭山復過海幸我堂前故巢在求  
食慎勿愛高飛空中飢鳶爲爾害辛勤作窠在画  
梁願得年年主人富

主人故池

高池高閣上連起荷葉團團蓋秋水主人已遠涼  
風生舊客不來芙蓉死

古宮怨

亂鳥啞啞飛復啼城頭晨夕宮中栖吳王別殿繞

江水後宮不開美人死

關山月

關山月營開道白前軍發凍輪當磧光悠悠照見  
三堆兩堆骨邊風剖面天欲明金莎嶺西看着沒

贈離曲

合歡葉墮梧桐秋鴛鴦背飛水分流少年使我忽  
相棄雌號雄鳴夜悠悠夜長月沒蟲切切冷風入  
房燈焰滅若知東路各東西彼此不忘同心結收  
取頭邊蛟龍枕留著箱中雙雉裳我今焚却舊房



王建詩卷二  
物免使他人登爾牀

宛轉詞

宛宛轉轉勝上紗  
紅紅綠綠苑中花  
紛紛泊泊夜飛鷗  
寂寞寂寞離人家

水夫謠

苦哉生長當驛邊  
官家使我牽驛船  
辛苦日多樂日少  
水宿沙行如海鳥  
逆風上水萬斛重  
前驛迢迢後森森  
半夜緣堤雪和雨  
受他驅遣還復去  
衣寒衣濕披短莎  
臆穿足裂忍痛何  
到明辛苦無處說  
齊聲騰踏牽船出  
一間茆屋何所直  
父母之鄉去不得  
我願此水作平田  
長使水夫不怨天

田家行

男聲欣欣女顏悅  
人家不怨言語別  
五月雖熟麥風清  
簷頭索索縲車鳴  
野蠶作繭人不取  
葉間撲撲秋蛾生  
麥收上場絹在軸  
的知輸得官家足  
不望入口復上身  
且免向城賣黃犢  
田家衣食無厚薄  
不見縣門身卽樂

去婦



新婦去年胼手足衣不暇縫蠶廢簇白頭使我憂  
家事還如夜裏燒殘燭當初爲取一作傍人語豈  
道如今自辛若在時縱嫌織絹遲有絲不上隣家  
機

神樹詞

我家家西老棠樹須晴卽晴雨卽雨四時八節上  
杯盤願神莫離神處所男不著丁女在舍事官上  
下無言語老身長健樹婆婆娑萬歲千年作神主

祝鵲

神鵲神鵲好言語行人早迴多利賂我今庭中栽  
好樹與汝作巢當報汝

古謠

一東一西壠頭水一聚一散天邊霞一來一去道  
上客一顛一倒池中麻

公無渡河

渡頭惡天

一作風

兩岼遠波濤塞川如疊坂幸無白

刃驅向前何用將身自棄捐蛟龍噬骨魚食血黃  
泥直下無青天男兒縱輕婦人語惜君性命還須



王建詩卷二  
取婦人無力挽斷衣舟沉身死悔難追公無渡河  
公須自爲

海人謠

海人無家海裏住採珠殺象爲歲賦惡波橫天山  
塞路未央宮中常滿庫

行見月

月初生居人見月一月行行行一年十二月強半  
馬上看盈一作圓缺百年歡樂能幾何在家見少行  
見多不緣衣食相驅遣此身誰願長奔波篋中有

帛倉有粟豈向天涯走碌碌家人一作中見月望我  
歸正是道上思家時

七夕曲

河邊獨自看一作對星宿夜織天絲難接續拋梭振  
躡動明璫爲有秋期眠不足遙愁今夜河水隔龍  
駕車轅鵲填石流蘇翠帳星渚間環珮無聲燈寂  
寂兩情纏綿忽如故復畏秋風生曉路幸迴郎意  
且斯須一年中別今始初明星未出少停車

兩頭織織



兩頭纖纖青玉玦半白半黑頭上髮偏偏仆仆春  
冰裂磊磊落落桃花結花一作初

獨漉歌

獨獨漉漉鼠食猫肉烏日中鶴露宿黃河水直人  
心曲

寄遠曲

美人別來無處所巫山月明湘江雨千迴相見不  
分明井底看星夢中語兩心相對尚難知何況萬  
里不相疑

傷韋令孔雀詞

可憐孔雀初得時美人爲爾別開池池邊鳳凰作  
伴侶羞聲鸚鵡無言語一作尋花飛雕籠玉架嫌不栖  
夜夜思歸向南舞一作南海枝如今憔悴人見惡萬里  
更求新孔雀熱眠雨水飢拾蟲翠尾盤泥金彩落  
多時人養不解飛海山風黑何處歸

傷隣家鸚鵡詞

東家小女不惜錢買得鸚鵡獨自憐自從死却家  
中女無人更共鸚鵡語十日不飲一滴漿淚漬綠



毛頭似鼠古關啞咽音哀怨開籠放飛離人眼短  
聲亦絕翠臆翻新墓崔嵬舊巢遠此禽有志女有  
靈定爲連理相並生

春來曲

春欲來每日望春門早開黃衫白馬帶塵土逢着  
探春人却迴御堤內園曉過急九衢大宅家人  
看春少女染桃花露粧初出紅猶濕光風嘖嘖蝶  
宛宛遶一作庭樹氣匝枝柯輒可憐寒食街中郎早  
起着得單衣裳少年卽是春好處似我白頭無好

樹

春去曲

春已去花亦不知春去處緣崗繞澗却歸來百迴  
看着無花樹就中一夜東風惡收紅拾紫無遺落  
老夫不比少年兒不中數與春別離

東征行

桐柏水西賊星落梟雛夜飛林木惡相國刻日波  
濤清當朝自請東南征舍人爲賓侍郎副曉覺蓬  
萊欠珮聲玉階舞蹈謝旌節生死向前山可穴同



時賜馬并賜衣御樓看帶弓刀發馬前猛士三百  
人金書左右紅旗新司庖常膳皆得對好事將軍  
封爾身男兒生殺在手裏營門老將皆憂死瞳瞳  
白日當南山不立功名終不還

荆門行

江邊行人暮悠悠山頭殊未見荊州峴亭西南路  
多曲欒林深深石鏃鏃看炊紅米煮白魚夜向雞  
鳴店家宿南中三月蚊蚋生黃昏不聞人語聲生  
紗帷疎薄如霧隔衣嗜膚耳邊鳴欲明不待燈火

起喚得官船過蠻水女兒停客茆屋新開門掃地  
桐花裏犬聲撲撲寒溪烟人家燒竹種山田巴雲  
欲雨熏石熱麋鹿過江蟲出穴大蛇過處一山腥  
野牛驚跳雙角折斜分漢水橫千山山青水綠荆  
門關向前問箇長沙路舊是屈原沉溺處誰家丹  
旄已南來逢著流人從此去月明山鳥多不栖下  
枝飛上高枝啼主人念遠心不憚羅衫臥對章臺  
夕紅燭交橫各自歸酒醒還是他鄉客壯年留滯  
尚思家况復白頭在天涯



鏡聽詞

重重摩娑嫁時鏡夫婿遠行憑鏡聽迴身不遣別  
人知人意丁寧鏡神聖懷中收拾雙錦帶恐畏街  
頭見驚怪嗟嗟際際下堂階獨自竈前來跪拜出  
門願不聞悲哀郎在任郎迴未迴月明地上人過  
盡好語多同皆道來卷帷上牀喜不定與郎裁衣  
失翻正可中三日得相見重繡鏡囊磨鏡面

行宮行

上陽宮到蓬萊殿行宮巖巖遙相見向前天子行

幸多馬蹄車轍山川遍當時州縣每年修皆留內  
人看玉案禁兵奪得明堂後長閉一作桃源與綺

繡一作開元歌舞古一作草頭梁州樂人世嫌舊

官家乏人作宮戶不泥宮墻斫宮樹兩邊仗屋半  
崩摧夜火入林燒殿柱休封中岳六十年行宮不  
見人眼穿

羽林行

長安惡少出名字樓下劫商樓上醉天明下直明  
光宮散入五陵松柏中百迴殺人身合死赦書尚



王建詩卷二  
有收城功九衢一日消息定鄉吏籍中重改姓出  
來依舊屬羽林立在殿前射飛禽

### 射虎行

自去射虎得虎歸官差射虎得虎遲獨行以死當  
虎命兩人相疑終不定朝朝暮暮空手迴山下綠  
苗成道徑遠立不敢汗箭鏃聞死還來分虎肉惜  
留猛虎著深山射殺恐畏終身閑

### 遠將婦

遠將婦勝未別離時在家相見熟新婦歡不足去  
願車輪遲迴思馬蹄速但令在舍相對貧不向天  
涯金遶身

### 尋橦歌

人間百戲皆可學尋橦不比諸餘樂重梳短髻下  
金鈿紅帽青巾各一邊身輕足栖勝男子繞竿四  
面爭先緣習多倚附欺一作竿滑上下踟躕皆着  
襪翻身垂頸欲落地却住把烟初似歇大竿百夫  
擎不起裏裏半在青雲裏纖腰女兒不動容戴行  
直舞一曲終迴頭但覺人眼見矜難恐畏天無風



三  
險中更險無蹉

一作何曾

失山鼠懸頭猿掛膝小垂一手

當舞盤斜慄雙蛾當落日斯須改變曲解新憤舞  
歡他平地人散時滿面生顏色行步依前無氣力

### 宮中調笑詞四首

團扇團扇美人並來遮面玉容憔悴三年誰復思  
量管絃管絃管春草昭陽路斷

蝴蝶蝴蝶飛上金花枝葉君前對舞春風百葉桃  
花樹紅紅樹紅樹燕語鶯啼日暮

羅袖羅袖暗舞春風已舊遙看歌舞玉樓好日新

粧坐愁愁坐愁坐一日虛生虛過

楊柳楊柳日暮白沙渡口船頭江水茫茫商人少  
婦斷腸腸斷腸斷鷓鴣夜啼失伴

### 銅雀臺

嬌愛更何日高臺空數層含啼映雙袖不忍看西  
陵漳水東流無復來百花輦路爲蒼苔青樓月夜  
長寂寞碧雲日莫空徘徊君不見鄴中萬事非昔  
時古人不在今人悲春風不逐君王去草色年年  
舊宮路宮中歌舞已浮雲空指行人往來處



王建詩卷第二

終

王建詩卷第三

送人遊塞

初晴天墮絲晚色上春枝  
城下路分處邊頭人去  
時停車數行日勸酒問回期  
亦是茫茫客還從此  
別離

塞上逢故人

百戰一身在相逢白髮生  
何時得鄉信每日算歸  
程走馬登寒壠驅羊入廢城  
羌笳三兩曲人醉海  
西營



南中

天南多鳥聲  
州縣半無城  
野市依蠻姓  
山村逐水  
名瘴烟沙上起  
陰火雨中生  
獨有求珠客  
年年入海行

汴路水驛

晚泊水邊驛  
柳塘初起風  
蛙鳴蒲葉下  
魚入稻花  
中去舍已云遠  
問程猶向東  
近來多怨別  
不與少年同年同

淮南使廻留別竇侍御

戀戀春恨結  
綿綿淮草深  
病身愁至夜  
遠道畏逢  
陰忽逐酒盃  
會暫同風景  
心從今一分  
散還是曉  
枝禽

汴路卽事

千里河烟直  
青槐夾岸長  
天涯同此路  
人語各殊  
方草市迎江  
貨津橋稅海  
商廻看故宮  
柳憔悴不  
成行

山居

屋在瀑泉西  
茅屋一作簷  
下有溪閉門  
留野鹿分食



養山雞桂熟長收子蘭生不作畦初開洞中路深處轉松梯

醉後憶山中故人

花開草復秋雲水自悠悠因醉暫無事在山難免愁遇晴須看月聞健且登樓暗想山中伴如今盡白頭

送流人

見說長沙去無親亦共愁陰雲鬼門夜寒雨瘴江秋水國山魃引蠻鄉洞主留漸看歸處遠一作垂

白住炎洲

貧居

眼底貧家計多時總莫嫌蠹生騰藥紙字暗一作脫換書籤避雨濕黃葉遮風下黑簾近來身不健時就六壬占

過趙居士擬直草堂處所

休師竹林北空可兩三間雖愛獨居好終來相伴閑猶嫌近前樹爲礙看南山的有深耕處春初須早還



王建詩卷三  
三  
新開望山處

新開望山處今朝減病眠應移千里道猶自數峰  
偏故欲遮春巷還來遶暮天老夫行步弱免到寺  
門前

題東華觀

路盡烟水外院門題上清鶴雛虛解語瓊葉軟無  
聲白髮道心熟黃衣仙骨輕寂寥虛境裏何處覓  
長生

飯僧

別屋炊香飯薰辛不入家溫泉調葛麵淨手摘藤  
花蒲鮓除青葉芹蘘帶紫芽願師常伴食消氣有  
薑茶

照鏡

忽自見憔悴壯年人亦疑髮緣多病落力爲不行  
衰暖手揉雙日看圖引四肢老來真愛道所恨覓  
還遲

歸昭應留別城中

喜得近京城官卑意亦榮並牀歡未定離室思還



王建詩卷三  
四  
生計拙偷閑住經過買日行如無自來分一驛是  
遙程

荅寄芙蓉冠子

一學芙蓉葉初開映水幽雖經小一作兒手不稱  
老夫頭枕上眠常戴風前醉恐柔明年有閨閣此  
樣必難求

長安春遊

騎馬傍閑坊新衣著雨香桃花紅粉醉柳樹一作絮  
白雲狂不覺愁春去何曾得日長牡丹相次發城

裏又須忙

冬夜感懷

晚年恩愛少耳目靜於僧一夜不聞語空房惟有  
燈氣噓寒被濕霜入破窗凝一作冷堦斷得人間  
事長如此亦能

初到昭應呈同僚

白髮初爲吏有慙年少郎自知身上拙不稱世間  
忙秋雨縣墻綠暮山宮樹黃同官若容許長惜老  
僧房



縣丞廳卽事

宮殿半山上人家高下居古廳眠受魘老吏語多  
虛雨水洗荒竹溪沙填廢渠聖朝收外府皆自九  
天除

閑居卽事

老病貪光景尋常不下簾妻愁耽酒僻人怪考詩  
嚴小婢偷紅紙嬌兒弄白髯有時看舊卷未免意  
中嫌

林居

荒林四面通門在野田中頑僕長如客貧居未勝  
蓬舊綿衣不暖新草屋多風唯去山南近閑親販  
藥翁

原上新居十三首

新占原頭地本無山可歸荒藤生葉晚老杏著花  
稀厨舍近泥竈家人初飽薇弟兄今四散何日更  
相依

一家榆柳新四面遠無隣人少愁聞病莊孤幸得  
貧耕牛長願飽樵僕每憐勤終日憂衣食何由脫



此身

長安無舊識百里是生

一作天

涯寂寞思逢友荒涼

喜見花訪僧求賤藥將馬中豪家乍

一作作

得新蔬

菜朝盤忽覺奢

雞鳴村舍遙花發亦蕭條野竹初生筍溪田未得

苗家貧僮僕瘦春冷菜蔬焦甘分長如此無名在

聖朝

春來梨棗盡啼哭小兒飢隣富雞長去莊貧客漸

稀借牛耕地晚賣樹納錢遲墻下當官路依山補

竹籬

自掃一間房唯鋪獨臥牀野羹溪菜滑山紙水苔

香陳藥初和白

一作蜜

新經未入黃近來心力少休

讀養生方

擬作讀經人空房置淨巾鎖茶藤篋密曝藥竹牀

新老病應隨業因緣不離身焚香向居士無計出

諸塵

移家近住村貧苦自安存細問梨果植遠求花藥

根倩人開廢井趁犢入新園長愛當山立黃昏不



閉門

和煖遶林行新貧足喜聲掃渠憂竹旱澆地引蘭  
生山客憑栽樹家僮使入城門前粉壁上書著縣

官名

粉一作分

住處鐘鼓外免爭當路橋身閑時却困兒病可來

嬌雞睡日陽暖蜂

蝶一作

狂花艷燒長安足門戶疊

疊看登朝

近來年紀到世事總無心古鶴憑人榻閑詩任客

吟送經還野院移石入幽林谷口春風惡梨花蓋

地深

懶更學諸餘林中掃地居膩衣穿不洗白髮短慵

梳苦相常多淚勞生自悟虛閑行人事絕親故亦

無書

住處去山近傍園麋鹿行野桑穿井長荒竹過墻

生新識隣里面未諳村社情名田無力及賤賃與

人耕

送李評事使蜀

勸酒不依巡明朝萬里人轉江雲棧細近驛板橋



王建詩卷三  
新石冷啼猿影松昏戲鹿塵少年爲客好況是益州春

新修道居

世間無所入學道處新成兩面有山色六時聞磬聲閑加經遍數老愛字分明若得離煩惱焚香過一生

贈洪哲師

老僧真古画閑座語中廳識病方書聖諳山草木靈人來多一作還施藥願滿不持經相伴尋溪竹秋

苔襪履青

題法雲禪院僧

不剃頭多日禪來白髮長合村迎住寺同學乞修房覺少持經力憂無養病糧上山猶得在自解衲衣裳

贈溪翁

溪田借四隣不省解憂身看日和仙藥書符救病人伴僧齋過夏中酒臥經旬應得丹砂一作霜來黑髮新一作力春



謝李續主簿

館舍幸相近因風及病身一官雖隔水四韻一作五字  
是同人衰臥朦朧曉貧居冷落春少年無不好莫  
恨滿頭塵

寒食

田舍清明日家家出火遲白衫眠古巷紅索搭高  
枝紗帶生難結銅釵重欲垂斬新衣踏盡還似去  
年時紅一作結

貽小尼師

新剃青頭髮生來未掃眉身輕禮拜穩心慢記經  
遲喚起猶侵曉催齋已過時春晴堦下立私地弄  
花枝

惜歡

當懽須且懽過後買應難歲去停燈守花開把火  
看狂來欺酒淺愁盡覺天寬次第頭皆白齊年人  
已殘

山中惜花

怨一作愁看花漸稀罪過酒醒時尋覓風來處驚張



三言詩卷三  
夜落時遊絲纏一作縈故藥宿葉守空枝開取當一作

溪軒地年年樹底期

和武門下傷韋令孔雀

孤號秋閣陰韋令在時禽覓伴海山黑思鄉橘柚  
深舉頭聞舊曲顧尾惜殘金顛顛不飛去重君池  
上心

題所賃宅牡丹花

賃宅得花饒初開恐是妖粉光深紫膩肉色退紅  
嬌且願風留著惟愁日炙焦可憐零落藥收取作

香燒

隱者居

山人住一作在處高看日上蟠桃雪縷青山脉雲生

百鶴毛朱書護身呪水喫斷邪刀何物中一作堪長

食胡麻慢火熬

昭應宮舍

繞廳春草合知道縣家閑行見雨遮院臥看人上  
山避風新浴後請假未醒間朝客輕卑吏從他不  
往還



王建詩卷第三

終

王建詩卷第四

杜中丞書院新移小竹

此地本無竹遠從山寺移  
經年求養法隔日記澆  
時嫩綠卷新葉殘黃收  
故枝色經寒不動聲與靜  
相宜愛護出常數稀稠看  
自知貧家緣未有客散  
獨行遲

同于汝錫賞白牡丹

曉日花初吐春寒白未凝  
月光裁不得蘇合點難  
勝柔膩於雲葉新鮮掩鶴  
膺統心黃倒暈側莖紫



重稜乍歛看如睡初開問欲磨並香幽蕙死比艷  
美人憎價數千金貴形相兩眼疼自知顏色好愁  
被彩光凌

送吳郎中赴忠州

西臺復南省清白上天知家每因窮散官多爲直  
移巡邊道驛近買藥出城遲朝野憑人別親情伴  
酒悲故園愁去後白髮想迴時何處忠州界山頭  
卓望旗

照鏡

終日日纏繞此身無適緣萬愁生旅夜百病湊衰  
年少睡憎明屋慵行待煖天癢頭梳有虱風耳灸  
聞蟬換白方多錯迴金法不全家悲一作貧何所戀  
時在老僧邊

秋日送杜虔州

憶得宿新宅別來餘蕙香初聞守郡遠一日臥空

牀野

一作井

驛烟火濕路人消息狂山樓添鼓角村

柵立旗槍晚

一作夕

渚露荷敗早衙風桂涼謝家章

句出江月少輝光



王建詩卷第四終

王建詩卷第五

贈王樞密

一作中貴王樞密守澄宗姓也

三朝行坐鎮相隨今上一作立春宮見小時脫下御

衣先賜着進來龍馬每一作便教騎長承密旨歸家

少獨奏邊機一作庭出殿遲自一作不是姓同親一作當家

偏向說九重爭得外人知

早秋過龍武李將軍書齋

高樹蟬聲秋巷裏朱門冷靜似閑居重裝画墨數  
莖竹長著香薰一架書語笑侍兒知禮數吟哦野



客任狂踈就中愛讀英雄傳欲立功勲恐不如

江陵卽事

瘴雲梅雨不成泥十里津頭一作壓大堤蜀女下

沙迎水客巴童傍驛賣山雞寺多紅葉燒人眼地

足青苔染馬蹄夜半獨眠愁在遠北看歸路隔蠻

溪

題花子贈渭州陳判官

膩如雲母輕如粉艷勝香黃薄勝蟬點綠斜蒿新

葉嫩添紅石竹晚花鮮鴛鴦比翼人初帖蛺蝶重

飛樣未傳況復蕭郎有情思可憐春日鏡臺前

送從姪擬赴江陵少尹

江陵少尹好閑官親故皆來勸自寬無事日長貧

不易有才年少屈終難沙頭欲買紅螺盞渡口多

呈白角盤應向章華臺下醉莫衝雲雨夜深寒

華清宮感舊

塵到朝元邊一作使急千官夜發六龍迴輦前月

照羅衫一作淚馬上一作風吹臈燭灰公主粧樓

金鎖澁貴妃湯殿玉池一作開有時雲外聞天樂



三  
知一作是先皇沐浴來

九仙宮主舊莊

仙居五里外門西石路親迴御馬蹄天使來栽宮  
裏樹羅衣自買院前溪野牛行傍澆花井本主分  
將灌藥畦樓上鳳凰飛去後白雲紅葉屬山雞

郭家溪亭

高亭望見長安樹春草崗西舊院斜光動綠烟遮  
岼竹粉開紅艷塞溪花野泉聞洗親王馬古柳曾  
停貴主車粧閣書樓傾側盡雲山新賣與官家

題金家竹溪

少年因病離天仗乞得歸家自養身買斷竹溪無  
別主散分泉水與新隣山頭鹿下長驚犬池面魚  
行不怕人鄉使到來一作常款語還聞世上有功  
臣

題應聖觀

觀卽李林甫舊宅

精思堂上画三身迴作仙官度美人賜額御書金  
字貴行香天樂羽衣新空廊鳥啄花輓縫小殿蟲  
緣玉像塵頭白女冠猶說得薔薇一作不似已前



春

同于汝錫遊降聖觀

秦時桃樹滿山坡騎鹿先生降大羅路盡溪頭逢  
地少門連內裏見天多荒泉壤一作簡朱砂暗古

塔殘經篆字訛聞說開元齋醮日曉移行漏帝親  
過

逍遙翁溪亭

逍遙翁在此徘徊帝改溪名起石臺車馬到春常  
借問子孫因選暫歸來稀疎野竹人移折零落蕉

花雨打開無主青山何所直賣供官稅不如灰

尋李山人不遇

山客長須少在時溪中放鶴洞中碁生金有氣尋  
還遠仙藥成窠見卽移莫與一作無家陪寺食應

緣將米寄人炊從頭石上留名去獨向南峰問老  
師

題石甕寺

青崖白石夾城東泉脉鍾聲內裏通地壓龍蛇山  
色別屋連宮殿匠名同簷燈經夏紗籠黑溪葉先



三  
建詩卷五  
四  
秋臘樹紅天子親題詩總在画扉長鑱碧一作龕  
中

早登西禪寺閣

上方臺殿第三層朝壁紅窗日氣凝烟霧開時分  
遠寺山川晴處見崇陵沙灣漾水圖新粉綠野荒  
阡暈色繒莫說城南月燈閣自諸樓看總難勝

題江寺兼求藥子

隋朝舊寺楚江頭深謝師僧引客遊空賞野花無  
過夜若看棋樹卽須秋紅珠落地求誰與青角垂

階自不收願乞野人三兩粒歸家將助小庭幽

題詵法師院

三年說戒龍宮裏巡禮還來向水行多愛貧窮人  
遠請長修破落寺先成秋天盆底新荷色夜地房  
前小竹聲僧院不求諸處好轉經惟有一窗明

酬于汝錫曉雪見寄

欲明天色

一作風定

白漫漫打葉穿簾雪未乾

一作雪打書窗

竹葉乾

薄落堦前人踏盡差池樹裏鳥銜殘旋銷迎

暖沾墻少斜舞遮春到地難勞動更栽新樣綺紅



燈一夜剪刀寒

從軍後寄山中友人

愛仙無藥

一作計

住溪貧脫却山衣事

一作伴

漢臣夜

牛聽雞梳白髮天明走馬入紅塵村童近去嫌醒  
食野鶴高飛避俗人勞動先生還相示別來弓箭  
不離身

寄汴州令狐相公

三軍江口擁雙旌虎帳長開自教兵機鑱惡徒狂  
寇盡恩驅老將壯心生水門向晚茶商鬧橋市通

宵酒客行秋日梁王池閣好新歌散入管絃聲

別李贇侍御

同受艱難驃騎營半年中聽揭槍聲草頭送酒驅  
村樂賊裏看花著探兵講易工夫尋已聖說詩門  
戶別來情薦書自入無消息賣盡寒衣却出城

和蔣學士新授章服

五色箱中絳服春笏花成就白魚新看宣賜處驚  
迴眼著謝恩時便稱身瑞草唯承天上露紅鸞不  
受世間塵翰林同賀文章出驚動茫茫下界人



王建詩卷五  
六  
歲晚自感

人皆欲得長年少無那排門白髮催一向破除愁  
不盡百方迴避老須來草堂未辦終須置松樹難  
成亦且栽瀝酒願從今日後更逢二十度花開

昭應官舍

癡頑終日美人閑却喜因官得近山斜對寺樓分  
寂寂遠從溪路借潺潺眇身多病唯親藥空院無  
錢不要關文案把來看未會雖書一字甚慙顏

寄舊山僧

因依老宿發心初半學修心半讀書雪後每常同  
席臥花時未省兩山居獵人箭底求傷鴈釣戶竿  
頭乞活魚一向風塵取煩惱不知衰病日難除

武陵春日

尋春何事却悲涼春到他鄉憶故鄉秦女洞桃歆  
澗碧楚王堤柳舞烟黃波濤入夢家山遠名利關  
身客路長不似真心叩塵寂玉編金軸有仙方

寄分司張郎中

一別京華年歲久卷中多見嶺南詩聲名已壓衆



三五言卷五  
人上愁思未平雙鬢知江郡遷移猶遠地仙官榮  
寵是分司青天白日當頭上會有求閑不得時

上武元衡相公

旌旗坐鎮蜀江雄帝命重開舊閣崇褒貶唐書天  
曆上捧持堯日慶雲中孤情迥出鸞皇遠徼思潛  
搜海嶽空長得蕭何爲國相自西流水盡朝宗

上張弘靖相公

傳封三世盡河東家占中條第一峰早歲天教作  
霖雨明時帝用補山龍草開舊路沙痕在日照新

池鳳跡重卑散自知霄漢隔若爲門下賜從容

上裴度舍人

小松雙對鳳池開履跡衣香逼上台天意皆從彩  
毫出宸心盡向紫烟來非時玉案呈宣旨每日金  
堦謝賜迴仙侶何因記名姓縣丞頭白走塵埃

上杜元穎相公

學士金鑾殿後居天中行坐侍龍輿承恩不許離  
牀謝密詔長教倚案書馬上喚遮紅背鴨船頭看  
釣赤鱗魚閑曹散吏無相識猶記荊州拜謁初



三言卷五  
贈盧汀諫議

青娥不得在牀前空室焚香獨自眠功證詩篇離  
景象樂成官位屬神仙閑過寺觀長作衝夜立送封  
章直上天近見蘭臺諸吏說御詩新集未教傳

賀楊巨源博士拜虞部員外

合歸蘭署已多時上得金梯亦未遲兩省郎官開  
道路九州山澤屬曹司諸生拜別收書卷舊客看  
來讀制詞殘著幾丸仙藥在分張還遣病夫知

贈郭將軍

承恩新拜上將軍當直巡更近五雲天下表章經  
院過宮中語笑隔墻聞密封計策非時奏別賜衣  
裳到處薰向晚臨堦看號簿眼前風景任支分

贈田將軍

初從學院別先生便領偏師得戰名大小獨當三  
百陣縱橫祇用五千兵迴殘疋帛歸天庫分好旌  
旗入禁營自執金吾長上直蓬萊宮裏夜巡更

贈胡江將軍

書生難得是金吾近日登科記總無半夜進讎當



玉殿未明排仗到銅壺朱牌面上分官契黃紙頭  
邊押勅符恐要蕃中新道路指揮重画五城圖

村居卽事

休看小字大書名向日持經眼却明時過無心求  
富貴身閑不夢見公卿因尋寺裏薰辛斷自別城  
中禮數生斜月照房新睡覺西峰半夜鶴來聲

留別田尚書

擬報平生未殺身難離門館起居頻不看匣裏釵  
頭古猶戀機中錦樣新一旦甘爲漳岼老全家却

作杜陵人朝天路在驪山下專望紅旗拜舊塵

送唐大夫寵節歸山

年少平戎老學仙表求骸骨乞生全不堪腰下懸  
金印已向雲西寄玉田旄節抱歸官路上公卿送  
到國門前人間雞犬同時去遙聽笙歌隔水烟

送司空神童

杏花壇上授書時不廢中庭趨蝶飛暗寫五經收  
部秩初年七歲着衫衣秋堂白髮先生別古巷青  
襟舊伴歸獨向鳳城持薦表萬人叢裏有光輝



送振武張尚書

迴天轉地是將軍扶助春宮上五雲無背恩雖同  
骨肉擁旄名未敵功勳盡收壯勇填兵數不向蕃  
渾奪馬群閑卽單于臺下獵威聲直到海西聞

送吳諫議上饒州

鄱陽太守是真人琴在牀頭籙在身曾向先皇邊  
諫事還應上帝處稱臣養生自有年支藥稅戶應  
停月進銀淨掃水堂無侍女下階唯共鶴殷勤

贈閻少保

髭鬚雖白體輕健九十三來却少年問事愛知天  
寶裏識人皆是武皇前玉裝劍珮身長帶綃寫方  
書子不傳侍女常時教合藥亦聞私地學求仙

送魏州李相公

百代功勳一日成三年五度換雙旌閑來不對人  
論戰難處長先自請行旗下可聞誅敗將陣頭多  
是用降兵當朝面受新恩去算料妖星不敢生

贈索暹將軍

渾身着箭瘢猶在萬槊千刀總過來輪劍直衝生



馬隊抽旗旋踏死人堆聞休鬪戰心還瘡見說烟  
塵眼即開淚滴先皇堦下土南衙班裏趁朝廻

贈王屋道士赴詔

玉皇符到

一作詔

下天壇玳瑁頭簪白角冠鶴遣院

中童子養鹿憑山下老人看法成不怕刀梯

一作槍

利體

一作髓

實常欺石榻寒能斷世間腥血味長生

只要一丸丹

贈王處士

松樹當軒雪滿池青山掩障

一作帳

碧紗幮鼠來案

下長偷水鶴在牀前亦看棋道士寫將行氣法家  
童授與步虛詞世間有似君應少便乞從今作我  
師

洛中張籍新居

最是城中閑靜處更迴門向寺前開雲山且喜重  
重見親故應須得得來借倩學生排藥合留連處  
士乞松栽自君移到無多日墻上人名滿綠苔

題裴處士碧虛溪居

鳥聲真似深山裏平地人間自不同春圃紫芹長



三  
卓卓暖泉青草一叢叢松臺前後花皆別竹崦高  
低水盡通細問來時從近遠溪名載入縣圖中

送阿史那將軍安西迎舊使靈櫬

漢家都護邊頭沒舊將麻衣萬里迎陰地背行山  
下火風天錯到磧西城單于送葬還垂淚部曲招  
魂亦道名却入杜陵秋巷裏路人來去讀銘旌

贈崔禮駙馬

鳳凰樓閣連宮樹天子崔郎自愛貧金埒減添栽  
藥地玉鞭平與賣書人家常絃管聽常少分外詩

篇看卽新一月一廻陪一作內宴馬蹄猶厭踏香  
塵

贈太清盧道士

上清道士未昇天南岳中華作散仙書賣八分通  
字學丹燒九轉定人年修行近日形如鶴導引多  
時首似綿想向諸山尋禮遍却廻還守老君前

送宮人入道

休梳叢鬢洗紅粧頭戴芙蓉出未央弟子抄將歌  
遍豐宮人分散舞衣裳問師初得經中字入靜猶



王建詩卷五  
燒內裏香發願蓬萊見王母却歸人世施仙方

上李吉甫相公

聖朝齊賀說逢殷霄漢無雲日月真金鼎調和天  
饈美瑤池沐浴賜衣新兩河開地山川正四海休  
兵造化仁曾向山東爲散吏當今竇憲是賢臣

上李益庶子

紫烟樓閣碧紗亭上界詩仙獨自行竒險驅迴還  
寂寞雲山經用始鮮明藕綃紋縷裁來滑鏡水波  
濤瀘得清昏思願因秋露洗幸容堦下禮先生

題元郎中新宅

近移松樹初栽藥經帙書籤一切新鋪設暖房迎  
道士支分閑院著醫人買來高石雖然貴入得朱  
門未免貧雖有好詩名字出倍教年少損心神

初授太府丞言懷

除書亦下一作不屬微班喚作官曹便不閑檢案事

多關市井聽人言志在雲山病童喚著唯行慢老  
馬鞭多轉放頑此去仙宮無一里遙看松樹衆家  
攀



贈李愬僕射

唐州將士死生同盡逐雙旌舊鎮空獨破淮西功  
業一作家傳大新除隴右世家雄知時每笑論兵法識  
勢還輕立戰功次第各分茅土貴殊勲併在一門  
中

書贈舊渾二曹長

二年同在華清下入縣門中最近隣替飲觥籌知  
戶小助成書屋見家貧夜碁臨散停分客朝浴先  
迴各送人僮僕使來傳語熟至今行酒校殷勤

上崔相公

枯桂衰蘭一遍春准將道德定君臣施行聖澤山  
川潤圖畫天文彩色新開閣覆看祥瑞曆封名直  
進薜蘿人應憐老病無知己自別溪中滿鬢塵

寄揚十二秘書

初移古寺正南方靜是浮山遠是莊人定猶行背  
街鼓月高還去打僧房新詩欲寫中朝滿舊卷常  
抄外國將閑出天門醉騎馬可憐蓬閣秘書郎

謝田贊善見寄



五侯三任一作未相稱頭白如絲作縣丞錯判符  
曹群吏笑亂書巖石一山僧自知酒病衰腸怯遙  
怕春殘百鳥凌年少力生猶不敵況加顛顛悶騰  
騰

晚秋病中

萬事風吹過耳輪貧兒活計亦曾聞偶逢新語書  
紅葉難得閑人語白雲霜下野花渾着地寒來溪  
鳥不成群病多體痛無心力更被頭邊藥氣薰

薛二十池亭

每箇樹邊消一日遶池行匝又須行異花多是非  
時有好竹皆當要處生斜豎小橋看鳥勢遠移山  
石作泉聲浮萍着岸風吹歇水面無塵晚更清

故梁國公主池亭

平陽池館枕秦川門鎖南山一朵烟素奈花開西  
子面綠榆枝散沈郎錢裝簷玳瑁隨風落傍岸鷓  
鴒逐暖眠寂寞空餘歌舞地玉簫聲絕鳳歸天

題柱國寺

皇帝施錢修此院半居天上半人間丹梯暗出三



重閣古像斜開一面山松栢自穿空地少川原不  
稅小僧閑行香天使長相續早起離城日午還

昭應官舍書事

縣在清華宮北面曉看樓殿正相當慶雲出處依  
時報御果呈來每度嘗膺月近湯泉不凍夏天臨  
渭屋多涼兩衙早被官拘束登閣巡溪亦屬忙

昭應李郎中見貽作次韻奉酬

窗戶風涼四面開陶公愛晚上高臺中庭不熱青  
山入野水初晴白鳥來精思道心緣境熟麤疎文

字和詩迴諸生圍遶新篇讀玉闕仙官少此才

閑說

桃花百葉不成春鶴壽千年也未神秦隴州緣鸚  
鵡貴王侯家爲牡丹貧歌頭舞遍迴迴別鬢樣眉  
心日日新鼓動六街騎馬出相逢總是學狂人

自傷

衰門海內幾多人滿眼公卿總不親四授官資元  
七品再經婚娶尚單身圖書亦爲頻移盡兄弟還  
因數散貧獨自在家常似客黃昏哭向野田春



田侍中宴席

香薰羅幕暖成烟火照中庭燭滿筵整頓舞衣呈  
玉腕動搖歌扇露金鈿青娥側座調雙管彩鳳斜  
飛入五絃雖是沂公門下客爭將肉眼看雲天

作間坐雲  
天作神仙

寒食日看花

早入公門到夜歸不因寒食少閑時顛狂遶樹猿  
離鎖跳躑緣崗馬斷羈酒污衣裳從客笑醉饒言  
語覓花知老來自喜身無事仰面西園得詠詩

和少府崔卿微雪早朝

蓬萊春雪曉猶殘點地成花遶百官已傍祥鸞迷  
殿角還穿瑞草入袍襪無多白玉階前濕積漸青  
松葉上乾粉画南山稜郭出初晴一半隔雲看

和胡將軍寓直

宮鷓栖定一作盡禁槍攢樓殿深嚴月色寒進狀直  
穿金戟槊探更先傍玉鈎欄漏傳五點班初合鼓  
動三聲仗已端遙見正南宣不坐新栽松樹喚人

看



春日五門西望

百官朝下五門西塵起春風過玉堤黃帕蓋鞍呈  
 了馬紅羅繫頂鬪迴雞館松枝重墻頭出御柳條  
 長水面齊唯有教方南草綠一作色古苔陰地冷凄  
 凄館松一作宮松枝重一作葉重御  
一作渠末云古城陰冷又凄凄

長安早春

霏霏漠漠遶皇州銷雪欺寒不自由先向紅粧添  
 曉夢爭來白髮送新愁暖催衣上縫羅一作勝晴人  
 報窗中點綵毬每度暗來還暗去今年須遣蝶遲

一作留

早春病中

日日春風階下起不吹光彩上寒株師教絳服禳  
 衰月妻許青衣侍病夫健美人家多力子祈求道  
 士有神符世間方法從誰問臥處還看藥草圖

上陽宮

上陽花木不曾秋洛水穿宮處處流画閣紅樓宮  
 女笑玉簫金管路人愁慢城入澗橙花發玉輦登  
 山桂葉稠曾讀列仙王母傳九天未勝此中遊



王建詩卷第五

終

王建詩卷第六

寄杜侍御

何須服藥覓昇天  
粉閣爲郎卽是仙  
買宅但幽從  
索價栽松取活不爭錢  
退朝寺裏尋荒塔  
經宿城南看野泉  
道氣清凝分曉爽  
詩情冷瘦滴秋鮮  
學通儒釋三千卷  
身擁旌旗二十年  
春巷偶過同戶  
飲暖窗時語對牀  
眠破除心力緣書癖  
傷瘦花枝爲酒顛  
今日總來歸聖代  
一作今日總 離軍馬地 丈人先達  
幸相憐



寄上韓愈侍郎

重登大學領儒流學浪詞鋒壓九州不以雄名疎  
野賤唯將直氣折王侯詠傷松桂一作青山瘦取  
盡珠璣碧海愁叙述異篇經總別鞭驅險句最一作  
總先投碑文合遣真魂謝史筆應令諂骨羞清俸  
探將還酒債黃金旋得起書樓叅來擬設官人禮  
朝退多逢月閣遊見向一作雲泉求佳處若無知  
薦一生休

贈華州鄭大夫

此官出入鳳池頭通化門前第一州少華山雲當  
驛起小敷溪水入城流空閑地內人初滿詞訟牌  
前草漸稠報狀拆開知兩足赦書宣過喜無囚自  
來不說雙旌貴恐替長教百姓愁公退晚涼無一  
事一作吏散日步行携客上南樓高府靜

寄賀田侍中東平功成

使廻高品滿城傳親見沂公在陣前百里旗幟衝  
卽斷兩重衣甲射皆穿探知點檢兵應怯算得新  
移柵未堅營被數驚乘勢破將經頻敗遂生全密



招殘寇防人覺遙斬元兇恐自專首讓諸軍無敢  
近功歸部曲不爭先開通州縣斜連海交割山河  
直到燕戰馬散驅還逐草肉牛齊散却耕田府中  
獨拜將軍貴門下兼分宰相權唐史上頭功第一  
春風雙節好朝天

送裴相公上太原

還携堂印向并州將相兼權是武侯時難獨當天  
下事功成却進手中籌再三陳乞鑪烟裏前後封  
章玉案頭朱架早朝排劍戟綠槐殘雨一作花裏看張

油遙知塞雁從今好直得漁陽已北愁邊鋪驚巡

旗盡換山城候館壁

一作欲  
過館

重修千群白刃兵迎

節十對紅粧妓打毬聖主分明交誓去不須高起  
見京樓



王建詩卷第六 終

王建詩卷第七

秋夜

夜久葉露滴秋蟲入戶飛臥多骨髓冷起覆舊綿衣

水精

映水色不別向月光還度傾在荷葉中有時看是露

香印

閑坐燒印香滿戶松栢氣火盡轉分明青苔碑上



字

秋燈

向壁暖悠悠羅幃寒寂寂斜照碧山圖松間一片石

落葉

陳綠向參差初紅已重疊中庭初掃地繞樹三兩葉

園果

兩中梨果病每樹無數箇小兒出入看一半鳥啄

破

野菊

晚艷出荒籬冷香著秋水憶向山中見伴蛩石壁裏

荒園

朝日滿園霜半衝籬落壤掃掠黃葉中時時一窠薤

南澗

野桂香滿溪石莎寒覆水愛此南澗頭終日潺湲



裏

晚蝶

粉翅嫩如水繞砌乍依風日高山露解飛入菊花

中

田家

啾啾雀滿樹靄靄東坡雨田家夜無食水中摘禾

黍

新嫁娘三首

隣家人未識床上坐堆堆郎來傍門戶滿口索錢

財

錦障兩邊橫遮掩侍娘行遣郎鋪簟席相並拜親

情

三日入厨下洗手作羹湯未諳姑食性先遣小娘

嘗

故行宮

寥落古行宮宮花寂寞紅白頭宮女在閑坐說玄

宗

酬從姪再看詩本



王建詩卷七  
眼暗沒功夫慵來翦刻磨自看花樣古稱得少年  
無

別自栽小樹

去年今日栽臨去見花開好住守空院夜間人不  
來

早發汾南

橋上車馬發橋南烟樹開青山斜不斷迢遞故鄉  
來

宮中三臺二首

魚藻池邊射鴨芙蓉苑裏看花日色柘袍相似不  
着紅鸞扇遮

池北池南草綠殿前殿後花紅天子千年萬歲未  
央明月清風

江南臺四首

揚州橋邊少婦長安城裏商人三年不得消息各  
自拜鬼求神

青草湖邊草色飛猿嶺上猿聲萬里湘江客到有  
風有雨人行



樹頭花落花開道上人去人來朝愁暮愁卽老百年幾度三臺

聞身強健且爲頭白齒落難追准擬百年千歲能得一作不知幾許多時

王建詩卷第七 終

王建詩卷第八

御獵

青山直遶鳳城頭澆水斜分入御溝新教內人唯射鴨長隨天子苑東遊

長門燭

秋夜牀前臈燭微銅壺滴盡曉鐘遲殘光一作花欲

滅還吹著年少宮人未睡時

過綺岫宮

東都水寧縣西五里

玉樓傾倒粉墻空重疊青山遶故宮武帝去來羅



袖盡野花黃蝶領春風

朝天子詞十首寄魏博士田侍中

山川初展

一作家

國圖寬未識龍顏坐不安風動白

髯旌節下過時天子御樓看

相感君臣總淚流恩深

一作榮

舞蹈不知休初從戰

地來無物唯奏新添十八州

催修水殿宴沂公與別諸侯總不同隔月太常先

習樂金書牌燹彩雲中

無人敢奪在先籌天子門邊送與毳遙索綵箱新

樣錦內人舁出馬前頭

御馬牽來親自試珠毬到處玉蹄知殿頭宣賜連

催上未解紅纓不敢騎

老作三公經獻壽臨時猶自語差池私從班裏來

長跪捧上金盃便合儀

四海無波乞放閑三封手疏犯龍顏他時若有邊

塵動不待天書自出山

胡馬悠悠未盡歸玉關猶隔吐蕃旗老臣一表求

高臥邊事從今欲問誰



威容難画

一作盡

改頻頻眉目分毫恐不真有詔別

圖書閣上先教粉本定風神

重賜弓刀內宴迴看人城外滿樓臺君臣不作多

特別收盡邊旗當日來

霓裳詞十首

弟子部中留一色聽風聽雨作霓裳散聲未作重

來授直到牀前見上皇

自直梨園得出稀更番上曲不教歸一時跪拜霓

裳徹立地堦前賜紫

一作衣

勅賜宮人澡浴迴遙看美女院門開一山星月霓

裳動好自先從殿後來

旋翻

一作自修

曲譜聲初起除却梨園未教人宣示書

家分手寫中官走馬賜功臣

傳呼法部按霓裳新得承恩別作行應是

一作貴

妃樓上看內人昇出綵羅箱

伴教霓裳有貴妃從初直到曲成時日長耳裏聞

聲熟拍數分毫錯總知

中管五絃初半曲遙教合上隔簾聽一聲聲向天



頭落學得仙人夜唱經  
絃索縱縱隔彩雲五更初發滿宮聞武王自送西  
王母新染霓裳月色裙  
朝元閣上風初起夜聽霓裳玉露寒宮女月中更  
替立黃金梯滑並行難  
知向華清秋月滿山頭山底種長生去時留下霓  
裳曲總是離宮別管聲

宮前早春

酒幔高樓一百家宮前楊柳寺前花內園分得溫

湯水二月中旬已進瓜

奉同曾郎中題石龕寺得嵌韻

寺門連內遶丹巖下界雲開數過帆遙指上皇翻  
曲處百官題字滿西嵌

舊宮人

先帝舊宮宮女在亂絲猶挂鳳凰釵霓裳法曲渾  
拋却獨自花間掃玉堦

贈人二首

金爐烟裏要班頭欲得歸山可自由每度報朝愁



入閣在先教示小千牛

多在蓬萊可

一作少

在家越緋衫上有紅霞朝廻不

向諸餘處騎馬城西檢校花

樓前

天寶年前勤政樓每年三日作千秋飛龍老馬曾  
教舞聞着音聲總舉頭

寄劉蕢問疾

年少病多應爲酒誰家將息過今春  
賒來半夏重薰盡投着山中舊主人

聽雨

半夜思家睡裏愁雨聲落落屋簷頭  
照泥星出依前黑淹爛庭花不肯休

新晴

夏夜新晴星校少雨收殘水入天河  
簷前熟着衣裳坐風冷渾無撲火蛾

秋日後

在一作住處近山常足雨聞晴  
睽曝舊芳茵立秋日後無多熱  
漸覺生衣不着身



哭孟東野二首

冷損秋天月不明  
蘭無香氣鶴無聲  
自從東野先生死  
側近雲山得散行

老松臨死不生枝  
東野先生早哭兒  
但是洛陽城裏客  
家傳一本杳殤詩

寄蜀中薛濤校書

萬里橋邊女校書  
枇杷花裏閉門居  
掃眉才子于今少  
管領春風總不如

路中上田尚書

去路何詞見六親  
手中刀足不如人  
可憐池閣秋風夜

愁一作怨綠嬌紅一遍新

于主簿廳看花

小葉稠枝粉壓催  
暖風吹動鶴翎開  
若無別事爲留滯  
應便拋家宿看來

江樓對面寄杜書記

竹烟花雨細相和  
看着閑書睡更多  
好是主人無事日  
應持小酒按新歌

十五夜望月寄杜郎中時會琴客



三  
建詩卷八  
六  
夜市千燈照碧雲高樓紅袖客紛紛如今不似時  
平日猶自笙歌徹曉聞

觀蠻妓

欲說昭君歛翠蛾清聲委曲怨於歌誰家年少春  
風裏拋與金錢唱好多

送顧非熊秀才歸丹陽

江城柳色海門烟欲到茅山始下船知道君家當  
瀑布菖蒲潭在草堂前

老人歌

白髮老人垂淚行上皇生日出京城如今供奉多  
新意錯唱當時一半聲

和元郎中從八月十二至十五夜翫月五  
首

半秋初入中旬夜已向堦前守月明從未圓時看  
却好一分分見傍輪生

亂雲遮却臺東月不許教依次第看莫爲詩家先  
見鏡被他籠與作艱難

今夜月明勝昨夜新添桂樹近東枝立多地濕昇



三言詩卷八  
七  
牀坐看過墻西寸寸遲

月似圓來色漸凝玉盆盛水欲侵稜夜深盡放家人睡直到天明不炷燈

合望月時長望月分明不得似今年仰頭五夜風中立一作坐從未圓時直到圓

對酒

爲病北來渾斷絕緣花不免却知聞從來事事關身少主領春風只在君

曉望華清宮

曉來樓閣更鮮明日出闌干見鹿行武帝自知身不死看修玉殿號長生

贈李愬僕射二首

和雪翻營一夜行神旗凍定馬無聲遙看火號連營赤知是先鋒已上城

旗旛四面下營稠手詔頻來老將憂每日城南空挑戰不知生縛入唐州

秋夜對雨寄石甕寺二秀才

夜山秋雨滴空廊燈照堂前樹葉光對坐讀書經



卷後自披衣被掃僧房

華清宮前柳

楊柳宮前忽地春在先驚動探春人  
曉來唯欠驪山雨洗却枝頭綠上塵

別楊校書

從軍末馬

一作未滿

十三年白髮營中聽早蟬故作老

丞身不避縣名昭應管山泉

和門下武相公春曉聞鶯

侵黑行飛一兩聲春寒轉小未分明  
若教更解諸

餘語應向宮花不惜情

田侍郎歸鎮八首

去處長將決勝籌迴迴身在陣前頭  
賊城破後先鋒入看着紅粧不敢收

慰帖朝衣拋戰袍夔龍班裏侍中高  
對時先奏牙間將次第天恩與節旄

踏着家鄉馬脚輕暮山秋色眼前明  
老人上酒齊頭拜得侍中來盡再生

功成誰不擁藩方富貴還須是本鄉  
萬里雙旌汾



水上玉鞭遙指白雲莊

鼓吹旛旗道兩邊行男走女喜駢闐舊交省得當時別指點如今却少年

廣場破陣樂初休彩纛高於百尺樓老將氣雄爭起舞管絃迴作大纏頭

笳聲萬里動燕山草白天清塞馬閑觸處不如別處樂可憐秋月照江關

將士請衣忘却貧綠窗紅燭酒樓新家家盡踏還鄉曲明月街中不絕人

寄廣文張博士

春明門外作卑官病友經年不得看莫道長安近於日昇天却易到城南

早春書晴

漸老風光不着人花溪柳陌早逢春近來行到門前少起暖閑眠似病人

唐昌觀玉蘂花

一樹籠鬆玉刻成飄廊點地色輕輕女冠夜覓香來處唯見堦前碎月明



王建詩卷八  
眼病寄同官

天寒眼痛少心情  
隔霧看人夜裏行  
年少往來常不住  
墻西凍地馬蹄聲

九日登叢臺

平原池閣在誰家  
雙塔叢臺野菊花  
零落故宮無入路  
西來澗水繞城斜

題酸棗縣蔡中郎碑

蒼苔滿字土埋龜  
風雨銷磨絕妙詞  
不向圖經中舊見  
無人知是蔡邕碑

江陵使至汝州

迴看巴路在雲間  
寒食離家麥熟還  
日暮數峰青似染  
商人說是汝州山

十五夜望月

中庭地白樹棲鴉  
冷露無聲濕桂花  
今夜月明人盡望  
不知秋思在誰家

宮詞一百首

蓬萊正殿壓金鰲  
紅日初生碧海濤  
開着五門遙北望  
柘黃新帕御牀高



殿前傳點各依班召對西來入詔蠻上得青花龍  
尾道側身偷覷正南山

龍烟日暖

一作氣

紫瞳瞳宣政門當玉殿風五刻閣

前卿相出下簾聲在半天中

白玉窗前起早臣櫻桃初赤賜嘗新殿頭傳語金  
階遠因進詞來謝聖人

內人對御疊花箋繡坐移來玉案邊紅蠟光中呈  
草本平明昇出閣門宣

千牛仗下放朝初玉案傍邊立起居每日進來金  
鳳紙殿頭無事不多書

延英引對碧衣郎紅硯宣毫各別牀天子下簾親  
考試宮人手裏過茶湯

未明開着九重關金画黃龍五色幡直到銀臺排  
仗合聖人三殿對西番

少年天子重邊功親到凌烟画閣中教覓勲臣寫  
圖本長將殿裏作屏風

丹鳳樓門把火開五雲金輅下天來堦前走馬人  
宣慰天子南郊一宿廻



王建詩卷八  
樓前立仗看宣赦萬歲聲長再拜齊日照彩盤高  
百尺飛仙爭上取金鷄

集賢殿裏圖書滿點勘頭邊御印同真跡進來依  
數字別收鎖在玉函中

秘殿清齋刻漏長紫微宮女夜焚香拜陵日近公  
卿發鹵簿分頭入太常

新調白馬拍鞭聲供奉騎來遶殿行爲報諸王侵  
早入隔門催進打毬名

對御難爭第一籌殿前不打背身毬內人唱好龜

茲急天子鞘回過玉樓

新衫一樣殿頭黃銀帶排方獺尾長總把金鞭騎  
御馬綠鬃紅額麝香香

羅衣葉葉繡重重金鳳銀鵝各一叢每遍舞時分  
兩向太平萬歲字當中

魚藻宮中鎖翠娥先皇行處不曾過如今池底休  
鋪錦菱角鷄頭積漸多

殿前明日中和節連夜瓊林散舞衣傳報所司分  
蠟燭監開金鎖放人歸



五更五點索金車盡放宮人出看花仗下一時催  
立馬殿頭先報內園家

城東北面望雲樓半下珠簾半上鈎騎馬行人長  
遠過恐防天子在樓頭

射生宮女宿紅粧請得新弓各自張臨上馬時齊  
賜酒男兒跪拜謝君王

新秋白兔大於拳紅耳霜毛趂草眠天子不教人  
射殺玉鞭遮到馬蹄前

內鷹籠脫解紅條鬪勝爭飛出手高直上碧雲還  
却下一雙金瓜掬花毛

競渡船頭掉綵旗兩邊濺水濕羅衣池東爭向池  
西岼先到先書上字歸

燈前飛入玉階蟲未臥常聞半夜鐘看着中元齋  
日到自盤金線繡真容

紅燈睡裏喚春雲雲上三更直宿分金砌雨來行  
步滑兩人擡起隱花裙

一時起立吹簫管得寵人來滿殿迎整頓衣裳皆  
着却舞頭當拍第三聲



琵琶先抹六么頭小管丁寧側調愁半夜美人雙  
唱起一聲聲出鳳凰樓

春池日暖少風波花裏牽船水上歌遙索劍南新  
樣錦東宮先釣得魚多

十三初學擘箏篴弟子名中被點留昨日教坊新  
進入並房宮女與梳頭

紅蠻捍撥帖胸前移坐當頭近御筵用力獨彈金  
殿響鳳凰飛下四條絃

春風吹雨洒旗竿得出深宮不怕寒誇道自家能

走馬園中橫過覓人看

粟金腰帶象牙錐散插紅翎玉突枝旋獵一邊還  
引馬歸來鷄兔遶鞍垂

雲駁花聰各試行一般毛色一般纓殿前來往重  
騎過欲得君王別賜名

每夜停燈熨御衣銀薰籠底火霏霏遙聽帳裏君  
王覺上直鐘聲始得歸

因喫櫻桃病放歸三年着破一作盡舊羅衣內中人  
識從來去結得金花上貴妃



欲迎天子看花去下得金階却悔行恐見失恩人  
舊院迴來衝一作憶着五絃聲

往來舊院不堪修教近宣徽別起樓聞有美人新

進入六宮未見一時愁

一作宮中誰識大家愁

自誇歌舞勝諸人恨未承恩出內頻連夜宮中修  
別院地衣簾額一時新

悶來無處可思量旋下金階旋下牀收得山丹紅

藥粉窗中先

一作洗

却麝香黃

蜂鬚蟬翅薄鬆鬆浮動搔頭似有風一度出時拋

一遍金條零落滿函中

合暗報來門鎖了夜深應別喚笙歌房房下着珠

簾睡月過金堦白露多

御厨不食索時新每見花開卽苦春白日臥多嬌

似病隔簾教喚女醫人

叢叢洗手遶金盆旋拭紅巾入殿門衆裏遙拋新

摘子在前收得便承恩

御池水色春來好處處分流白玉渠密奏君王和  
入月喚人相伴洗裙裾



王建詩卷八  
移來女樂部頭邊新賜花檀大五絃縷得紅羅手  
帕子中心細画一雙蟬

新晴草色綠溫暾山雪初消漸水渾今日踏青歸  
校晚傳聲留着望春門

兩樓相喚珠簾額中尉明朝設內家一樣金盤五  
千面紅蘇點出牡丹花

盡送春求出內家記巡傳把一枝花散時各自燒  
紅燭相逐行歸不上車

家常愛着舊衣裳空插紅梳不作粧忽地下堦裙

帶解非時應得見君王

別勅教歌不出房一聲一遍奏君王再三博士留  
殘拍索句宣徽作徹章

行中第一爭先舞博士傍邊亦被欺忽覺管絃偷  
破拍急翻羅袖不教知

私縫黃帔捨釵梳欲得金仙觀內居近被君王知  
識字收來按上檢文書

月冷江清近臘時玉堦金瓦雪澌澌浴堂門外抄  
名入公主家人謝面脂



王建詩卷八  
未承恩澤一家愁乍到宮中意外頭求守管絃聲  
欵逐側商調裏唱伊州

東風潑火雨新休  
昇盡春泥掃雪溝  
走馬犢車當御路  
漢陽宮主進鷄毬

風簾水閣壓芙蓉  
四面鈎欄在水中  
避熱不歸金殿宿  
秋河織女夜粧紅

聖人生日明朝是  
私地先須屬內監  
自寫金花紅榜子  
前頭先進鳳凰衫

避暑昭陽不擲盧  
井邊含水噴鴟雛  
內中數日無呼喚  
榻得滕王蛺蝶圖

內宴初秋入二更  
殿前燈火一天明  
中官傳旨音聲散  
諸院門開觸處行

玉蟬金雀三層插  
翠髻高叢綠髮虛  
舞處春風吹落地  
歸來別賜一頭梳

樹葉初成鳥護窠  
石榴花裏笑聲多  
衆中遺却金釵子  
拾得從他要贖麼

小殿初成粉未乾  
貴妃姊妹自來看  
爲逢好日先移入  
續向街西索牡丹



內人相續報花開准擬君王便看來逢着五絃琴  
繡袋宜春院裏按歌迴

巡吹慢遍不相和暗數看誰曲校多明日梨花園

裏見先須逐

一作直

得內家歌

黃金合裏盛紅雪重結香羅四出花一一傍邊書  
勅字中官送與大臣家

未明東上閣門開排仗聲從後殿來阿監兩邊相  
對立遙聞索馬一時迴

宮人早起笑相呼不識堦前掃地夫乞與金錢爭

借問外頭還似此間無

不隨阿妹學吹笙見好君王賜與名夜拂玉牀朝  
把鏡黃金殿外不教行

日高殿裏有香烟萬歲聲長動九天妃子院中初  
降誕內人爭乞洗兒錢

宮花不共外花同正月長先一半紅供御櫻桃看  
守別直無鷓鴣到園中

殿前鋪設兩邊樓寒食宮人步打毬一半走爭來  
跪拜上棚先謝得頭籌



王建詩卷八  
太儀前日暖房來，囑向朝陽乞藥栽。  
勅賜一窠紅躑躅，謝恩未了奏花開。

御前新賜紫羅襦，步步金階上軟輿。  
官局總來爲喜樂，院中新拜內尚書。

鸚鵡誰教轉舌關，內人手裏養來姦。  
語多更覺承恩澤，數對君王憶隴山。

分明閑坐賭櫻桃，收却投壺玉腕勞。  
各把沉香雙陸子，局中鬪累阿誰高。

禁寺紅樓內裏通，笙歌引駕夾城東。  
裹頭官監堂前立，手把弓弰竹彈牙。

春風院院落花堆，金鎖生衣製不開。  
更築歌臺起粧殿，明朝先進畫圖來。

舞來汗濕羅衣徹，樓上人扶下玉梯。  
歸到院中重洗面，金盆水裏潑銀泥。

宿粧殘粉未明天，總在昭陽花樹邊。  
寒食內人長白打，庫中先散與金錢。

衆中偏得君王笑，偷把金箱筆硯開。  
書破紅蠻隔子上，旋推當直美人來。



三  
三  
教遍宮娥唱遍詞暗中頭白没人知樓中日日歌  
聲好不問從初學阿誰

青樓小婦研裙長總被抄名入教坊春設殿前多  
隊舞棚頭各別請衣裳

水中芹葉土中花拾得還將避衆家總待別人般  
數盡袖中拈出鬱金牙

玉簫改調箏移柱催換紅羅繡舞筵未戴柘枝花  
帽子兩行宮監在簾前

窗窗戶戶院相當總有簾珠玳瑁牀雖道君王不  
來宿帳中長是炷芽香

銀燭秋光冷画屏輕羅小扇撲飛螢天街夜色涼  
如水臥看牽牛織女星

雨入珠簾滿殿涼避風新出玉盆湯內人恐要秋  
衣着不住燠籠換好香

金吾除夜進儺名画袴朱衣四隊行院院銀燈如  
白日沉香火底坐吹笙

樹頭樹底覓殘紅一片西飛一片東自是桃花貪  
結子錯教人恨五更風



金殿當頭紫閣重仙人掌上玉芙蓉太平天子朝  
元日五色雲中駕六龍

日晚長秋簾外報望陵歌舞在明朝添爐欲蒸熏  
衣射憶得分時不忍燒

日映西陵松栢枝下臺相顧一相悲朝來樂府歌  
新曲唱着君王自作詞

泪盡羅巾夢不成夜深前殿按歌聲紅顏未老恩  
先斷斜倚熏籠坐到明

新鷹初放兔初肥白日君王在內稀薄暮千門臨

欲鎖紅粧飛騎向前歸

黃金捍撥紫檀槽絃索初張調更高盡理昨來新  
上曲內官簾外送櫻桃

鴛鴦瓦上瞥然聲晝寢宮娥夢裏驚元是我王金  
彈子海棠花下打流鶯

寶仗平明金殿開暫將紈扇共徘徊玉顏不及寒  
鴉色猶帶昭陽日影來

閑吹玉殿昭華管醉折梨園縹蒂花千年一夢歸  
人世絳縷猶封繫臂紗



王建詩卷第八終

汲古閣毛晉  
據宋本考較

建字仲初潁州人大曆十年進士初為渭南尉值內官王樞密名守澄者盡宗人之分然彼我不均復懷輕謗之色忽過飲語及漢桓靈信任中官起黨錮興廢之事樞密深恨其譏迺曰吾弟所作宮辭天下皆誦于口禁掖深邃何以知之建不能對將奏劾為詩以贈之云先朝行坐鎮相隨今

上春宮見長時脫下御衣偏得著進來龍馬每教騎常承密旨還家少獨對邊情出殿遲不是當家頻向說九重爭遣外人知事遂寢歷官昭應丞太府寺丞太和中為陝州司馬陳氏云長于樂府與張籍相上下尤長宮詞在本集第十卷錄出另行馬氏云宮詞天下傳播倣此體者雖有數家而建為之祖計氏止載宮詞百絕及上李庶子王樞密兩篇王氏百家詩集不列姓



氏余舊刻三家宮詞惜未詳覈因錄茗溪  
漁隱叢話數則于八卷之尾以為補註隱

湖毛晉識





